

Chinangwa Chakapetwa

Katanhatu Chekushanya

KwaGabrieri Kuna Dhanieri

 Asi ndashamiswa kwazvo ne...vechidiki vedu mangwanani ano, vadiki, munoziva, vadiki vana “fefe” na “fifi,” vadiki, ivo, munoziva, vane gumi nematanhatu. Zvino vanouya muchechi, munoziva, nezve...Vasikana vadiki, vangangoita vezera iroro, vanoda kutaridzika kuve vakanaka, munoziva. Ivo, munoziva, vhudzi rakamonwamonwa, pamusoro pemisoro yavo; Ndavacherechedza, pandange ndichiparidza, richingoramba richiyerera pasi, richiyerera pasi. Uye, mushure mechinguva, vazonge vave kurifuridzira kumashure vachiribvisa kumeso kwavo, bvudzi rakamonwamonwa ratwasuka rose.

² Mwanasikana mudiki waHanzvadzi Downing, uye—uye ndamucherechedza. Nemudiki—mudiki—mudiki...mudiki waHama Collins...Zita rake ndiani? Mudiki... [Imwe hama inoti, “Betty.”—Mupepeti] Betty, Betty mudiki. Ndaita sekungoseka zvishoma, ndega. Asi ndaona runako rwese, munoziva, zvese zvakagadzirwa zvakanaka, zvino pakare ipapo zvaive...

³ Zvakanaka, moyo yenyu ngairopafadzwe, mudiwa, wakanaka, kwandiri, zvakadaro. Ndizvozvo chaizvo. *Runako*, ndirwo, ndiwo mweya wakanaka unouya wogara mumisangano saizvozvo, woteerera kuEvhangeri. Ndizvo zvinoita kuti musikana ave nerunako. Uye ndinofunga kuti chero mukomana chaiye, akakodzera kuroora, anofunga zvimwe chetezvo. [Hama Neville vanoti, “Ameni.”—Mupepeti] Mazvita, changamire. Zvakanaka izvi. Mumwe munhu abvumirana neni. Kuti, ndizvozvo. Zvakanaka. Ndinotenda kuti ichocho iChokwadi.

⁴ Zvino hazvishamise here? Ndavhura chaipo pana Dhanieri 9 pandavhura Bhaibheri rangu. Zvino, ndinowanzoudza munhu wese, kuti vasabvise bhachi ravo, vane buri mushati yavo, saka ndine tariro yekuti yangu haina. Asi—asi ndakaona nguva apo ndakatadza kuribvisa, paine buri mushati, chokwadi chakakwana. Uye ndinofungidzira kuti iyi haina.

⁵ Zvino, oo, zvangu pachangu, isu...uye ndinotenda kune ungoro, tinoyemura Hupo hweMweya Mutsvene mangwanani ano.

Uye tinoyemura kuyanana nehupo hwemumwe kune mumwe. “Zvinotapira sei, zvakanaka sei, zvinofadza sei, kuti hama dzigare pamwe chete muhumwe. Zvakafanana nemafuta ekuzodza anokosha anoyerera achidzika nendebvu dzaAroni, kunosvika kumipendero yehanzu yake.”

⁶ Ndaenda kunodya nhasi, uko kuBlue Boar, uye ndiani wandasangana naye ikoko asi Hama Bill ava, naHanzvadzi Dauch vagere apo, vachingo—vachingodya havo imwe yehuku inotaridzika, kuti yakakangwa zvepamusoro-soro yandati ndamboona, uye vachingova nenguva yakanaka, vachidikitira nekuda kwayo, munoziva. Ndaenda kuimba yekumusoro ndokusangana nechikamu chikuru chechechi kumusoro ikoko, uye vanga vachida kutondibhadharira kudya kwangu kwemasikati. Zvino, izvozvo zvanga zvakanaka chaizvo, ndinozviyemura.

⁷ Pandasvika kumba, heuno Billy auya nebhokisi remadomasi iro randaunzirwa nemumwe munhu, achibva nzira yose kunzvimbo iyoyo yakanaka, inotonhorera yeGeorgia zasi ikoko, uko kunotonhorera kwazvo zasi ikoko, vanondiudza, panguva seino.

⁸ Ndokubva, ndasangana nemumwe muchinda mudiki panze. Ndanga ndichibuda kubva muhurukuro dzangu, masikati ano, ndichiuya zasi kuchechechi inenge awa nehafu yapfuura, uye mudiki... akaita semuchinda wechidiki, kunze, ati... Ndati, “Kuri kupisa.”

Akati, “Zvedi kuri!” Ndaziva kuti anobva kuGeorgia, saka ati, “Chokwadi kuri kupisa zasi kuGeorgia!”

⁹ Saka, tiri kuedza kutiza nzvimbo inodarika pakupisa, hatisi here? Ndizvo zvataura pano.

¹⁰ Maita henyu chaizvo, shamwari, nehunaku hwenyu hwese. Ndaizoitei pasina imi? Chingava chii—chii chandaizoita pasina imi? Dai ndisina munhu anondida, pasina munhu aiteerera kuMharidzo, Mharidzo yangu yese yaishaya basa zvachose. Handikwanise kuIparidza kumapango enhare uye nemiti. Hazvaimbozvinzwisisa. Saka vanofanirwa kunge vari vanhu vakaita semi mese, vanozouya uye vachizviteerera. Zvino pamunouya mogara munzvimbo inopisa seino, uye kuri... Mudzimai wangu ati aita seachatsva kumashure uko, mangwanani ano. Uye kuona vanhu, uye dzimwe nguva vanhu vanorwara, vakagara mumisangano iyoyo zvakadaro, Mwari vakupei musha wa—wakanaka, unoyevedza muKubwinya, ndiwo munamato wangu. Uye ndinongotarisa nekuvimba kuti Vachaita izvozvo.

¹¹ Zvino, ngatione. Bhachi rangu, mumwe munhu aenda naro neche uko. Zvino ndinofanira kuti verengei zvisihoma manheru ano. Vangani vari kunakidzwa nezvikamu zvekutanga zveizvi? [Ugano inoti, “Ameni.”—Mupepeti] Oo, dai kwanga

kusiri kupisa zvakanyanya, taingoramba tichienderera mberi, nemuvhiki rose chairo, nebhu—Bhuku raZvakazarurwa. NdinongoRida. Ndinongogara hangu maRiri. Uye imi itai, tingati, kuitira ini, vhiki rino, nekuti Svondo inotevera ini...Ishe vachitendera, ndinofanira kusangana nazvo, ndichiisa mavhiki iwayo pamwe chete. Uye ndicho chimwe chinhu chandisiri kuziva kana chinhu nezvacho. Uye saka ndichangovimba naShe kuti Vachava nemhinduro kwandiri.

¹² Uye nda—ndakaverenga varume vakasiyana-siyana va—vakataura nezvazvo, avo vakanyora nezvazvo. Ndakaverenga vakanyorwa zvemuzasi pano, zvaChiremba Scofield, mudzidzi mukuru, asi zvirokwasvo handina kukwanisa kubvumirana navo, pane zvinyorwa zvavo zvemuzasi zvakanwanda, nekuti handisi kukwanisa kuzviona. Uko...Zvinofanira ku—zvinofanira kugadzirisa mufananidzo wacho zvakanaka.

¹³ Zvino, kana waive uri kurongerera panzvimbo zvidimbu zvemufananidzo zvakavhenganiswa pamwe chete, uye chinhu chekutanga unoziva, unoti, “Oo, ichi chinoenda kumusoro *kuno*. Kwete, ndine chokwadi chekuti ichi chinoenda kumusoro *kuno*.” Saka, unofanirwa kutarisa neche kuno papatani yako, kuti uone zvauri kuita. Uyezve kana uka—kana ukasadaro, uchaita kuti mufananidzo wako unge wakavhengana—vhengana wese.

¹⁴ Zvino ko kana waifanira kutora...uine mufananidzo wenzvimbo yekumaruwa huru, yakanaka, uye paine mombe ichifura huswa iri pamusoro pemuti? Zvino, izvozvo zvinenge zvisiri izvo (handiti here?), nekuti haifure huswa pamusoro pemuti. Saka, ndiyo nzira yazviri kana, iwe, Mweya Mutsvene ukasaisa Rugwaro irworwo pamwe chete. Ipapo, wava nemufananidzo mukuru wakazara, werudzikinuro. Ndizvo zvatinoda, Chokwadi. Uye kusvikira taziva Chokwadi, tichangozvisiya zvakadaro. Uye zvaro, kana Mwari vatipa Chokwadi, saka, ipapo ndichazotaura nezvazvo.

¹⁵ Munozivei? Ndinofungidzira Hama Roy Slaughter ne—nevamwe venguva dzakare pano, vakatanga kumashure-shure uko kare-kare...Paive neangaite, ndinofungidzira, makore matatu kana mana ekutanga kweshumiro yangu, ipo pano patabhanakeri, Ndaisatomboparidza nezvenyaya yegehena, nekuti nda—ndaibatadza kuziva kuti yaiva nzvimbo inobvira here, kana kuti raive guva. Uye nguva dzese Shoko parakataura kuti, *guva*, ndaiwana dudziro, yakanzi, “*Hadhesi*.” *Hadhesi* ndiro “*guva*.” Nguva dzese paRaitaura nezve gehena, “*Hadhesi*, *guva*.” Zvino ndakangozvisiya zvega kusvikira ndanyatsoziva zvandaitaura nezvazvo, ndokubva ndazoparidza nezve gehena, saka pandakanyatsowana mufananidzo wacho wese uye nekuona pazvaiva. Nekuti, ndinonzwa kuti mushumiri ane mungava kuna Mwari, izvo zvaanotaurira ungoro iyoyo, nekuti vari kuzobatirira chaizvo pane izvozvo. Uye saka, zvakare, ko kana ndakavaita kuti vabatirire panzvimbo isiri iyo, uye ipapo

nguva inozouya apo kubatirira ikoko hakuchakwanisiki kumira? Maona?

Uye muchiratidzo icho Ishe chavakandipa, imwe nguva yapfuura, apo mamiriyoni aye...apo Uyo aitaura neni, akati, “Uchazotongwa, kutanga, neVhangeri raunoparidza.”

¹⁶ Ndikati, “Ndinoparidza zvimwe chete zvakaitwa naPauro, nevamwe vese.”

¹⁷ Uye mamiriyoni ese iwayo emanzwi akadanidzira, “Takazorora pazviri.” Ndizvo zvazvaiva. Maona? Ndizvo.

¹⁸ Saka ndinoda kupfuurira mberi manheru ano, zvino, kuti tisatore nguva yakarebesa. Uye musakanganwa zvino... Zvino, mangwanani ano...Ndine zvinyorwa zvidiki pano. Mangwanani ano ndataura nezvaDhanieri ari muhutapwa, Gabrieri achiuya kwaari ndokumuraira pane ramangwana. Ndizvo zvatava nazvo mangwanani ano, kurairwa pane ramangwana.

¹⁹ Zvino, manheru ano, tiri kutaura pamusoro pe*Chinangwa Chakapetwa Katanhatu Chekushanya kwaGabrieri Kuna Dhanieri*. Svondo inotevera, Ishe vachitendera, ndichaisa mavhiki makumi manomwe, panzvimbo yawo, muchikamu chenguva. Uye takamira papi? Zvino, dai tikangogona chete kuzviwana nekuzviita kuti zvive zvechokwadi, zviri izvo chaizvo, ipapo tichazoziva nguva yacho yatiri kurarama. Zvino, hatizombozivi kuti Anouya riinhi; hapana achaziva izvozvo. Jesu haazvizive, pachaKe. Akati Akange asingazive. Akangoti Baba chete, vega, vanozviziva. Kunyange Vatumwa havazvizive. Hapana mumwe wedu anoziva kuti Vanouya rinhi, asi tinogona kutaura ngu—nguva iyo...nguva yatiri kurarama, tichiziva chete kuti tinogona kuva taswadera pedyo zvakadii.

²⁰ Zvino, kuti dzokerei kumashure zvishoma, nekuti vakomana vari kutora matepi eizvi...Michina iri kumhanya kumashure mukamuri. Uye matepi, hongu, anotumirwa kunze, kwese-kwese.

²¹ Zvino, chidzidzo chamangwanani ano, mushure mekunge taongorora zvakare pachitsauko 4 ne 5, ndokubva tanamatira... kutanga nechitsauko 9 chaDhanieri. Uye zvino, manheru ano, tiri kuenderera mberi nechitsauko 9. Tisati tasvika pachiri, ngatimbokotamisai misoro yedu kwechinguvana uye titaure neMunyorori weShoko.

²² Mwari vedu vane nyasha, tine chokwadi chekuti Munoziva chinangwa chaicho chemoyo wedu. Munoziva kuti sei tiri pano. Uye Munoziva kuti hatina kubvira tauya manheru ano nekungoda kwekuti tafunga kuti yaizova nzvimbo yakanaka yekuuya, yekumbova takadekara hedu zvishoma masakati. Baba, handitende kuti pane munhu mumwe chete ari pano nekuda kwechinangwa ichocho. Ndinotenda kuti tiri pano manheru ano

nekuti takaperera zvakanyanyisa, takatendeka, uye tiri kuda kuziva ZVANZI NAJEHOVHA.

²³ TinoKudai, Ishe, uye tinoda Shoko reNyu. Uye kana nzvimbo ino yaMakatipa, inongova denga pamusoro pemisoro yedu, nemazidhinha aya ekongiri, tinopa kutenda kwaMuri nokuda kwenzvimbo iyoyi. Nekuti, tinotenda kuti kune Musha uri mhiri kwedenga, uko kwatakananga nenzira iyoyo. Uye tinofunga nezve madzitateguru edu vasina kana kumbowana mukana uyu, uye zvinotiita kuti tikotamise moyo yedu nekunyara, Ishe, kutombonyunyuta chaiko.

²⁴ Zvino, Baba, tinonamata kuti Muvhure kwatiri, manheru ano, Rugwaro. Huyai, fambai pamwe chete, padivi remumwe nemumwe wedu, patiri kudzika zasi nenzira ino manheru ano. Taurai nesu sezvaMakaita neavo vaienda kuEmausi, vachibva kuJerusarema. Kuti, kana shumiro yapera, manheru ano, tinogona kuenda kudzimba dzedu dzakasiyana-siyana uye toti, “Moyo yedu haina kutsva matiri here apo pataMunzwa achitaura kuburikidza neShoko raKe!”

²⁵ Ropafadzai zvinoverengwa. Ropafadzai kushingaira kwangu kune hutera, Ishe. Vhurai muromo wangu kune izvo zvinova chokwadi, uye muuvhare kune izvo zvisiri izvo. Uye Zviwanirei mbiri, uye nekubwinya muvanhu veNyu, kuti vagone kuona nguva yatiri kurarama uye neKuuya kwaIshe Jesu kwaswedera. Nokuti, tinozvikumbira muZita raKe—raKe, Zita raJesu Kristu. Amen.

²⁶ Zvino, kudzokera shure neMagwaro edu kwenguva shoma, tinoona kuti Dhanieri anga ave muhutapwa kwemakore akareba makumi matanhatu nemasere. Pafungei! Zvino, iwe, uine bepa rako nepenzura, unge usina kuzvibata mangwanani ano, unogona kuzvibata manheru ano. Kubva muna A.D. 606 kusvika 538. Tora 538 kubva muna 606, une makore makumi matanhatu nemasere ayo Dhanieri aange ari mu...nhapwa; pasina chechi yekuenda kwairi, pasina mharidzo dzekunzwa, pasina kana. Asi akange aine mamwe mabhuku, mamwe mabhuku ekupetera, ayo mumwe muporofita akamutangira ainge akaporofita, uye aiva—aiva Jeremia.

²⁷ Zvino, ari kumunzvera Magwaro, akaona kuti nguva yave kupera, kuti nguva yemakore makumi manomwe...Dhanieri akatenda zvakaperera shoko rose rakataurwa nemuporofita Jeremia. Uye ndinoti kune iyi, kune kirasi yangu manheru ano: Tinofanira kutenda vaporofita vedu here? [Ungano inoti, “Ameni.”—Mupepeti] Hongu, changamire. Nokuti, Shoko raJehovha rakauya kuvaporofita. Vane ZVANZI NAJEHOVHA. Zvino muporofita wechokwadi haazombotsauka achibva kune sho—shoko remumwe muporofita. Havambofi vakaRiita kuti ritaure chimwe chinhu chaRisingataure. Vanotaura chaizvo—chaizvo zvakataurwa nemuporofita wechokwadi, ndizvo

zvinovaita muporofita. Zvino kana vawana izvozvo, uye ipapo vanofanotaura zvichauya, vachiziva izvi, nekutya mumoyo mavo, zvichida vangazotaura zvisiri izvo uye zvozogona kutsautsa mumwe munhu. Hatimbodi kuita izvozvo. Tinoda kuva nechokwadi chemazvirokwazvo kuti tine Shoko raShe tisati tati ZVANZI NAJEHOVHA. Maona? Rinofanira kunge riri mhedziso, shoko chairo rinobva paChigaro chehumambo chaMwari, kana kuti isu hatifanire kutomboritura.

²⁸ Zvino, apo ari mukunzvera Magwaro, akaona kuti makore makumi manomwe akanga ave kupera. Saka, iye ari ikoko kwemakore makumi matanhatu nemasere, kwasara makore maviri mune ramangwana kusvikira Mwari vaidzoreredza vanhu vaVo vachidzokera kunyika yekumusha kwavo.

Ari mumunamato, tinoona kuti paive neMutumwa mukuru akauya achibva Kudenga. Pane munhu anokwanisa kudana zita raKe here? [Ungano inoti, “Gabrieri.”—Mupepeti] Gabrieri. Uye ndiYe Mutumwa kuchechi yechiJudha. Vangani vanozviziva izvozvo? Kwese-kwese, ndiGabrieri. Gabrieri ndiye mutumwa kuchechi, chechi yechiJudha; akauya kuna Maria; Akauya kuna Zakaria. Nguva dzose, ndiGabrieri. Uye ndiYe mumwe weNgirozi huru dzeKudenga. Zvino haAna here kuunzira Hama yedu Dhanieri kwaziso yakanaka kwazvo kubva kuna Mwari! “Oo, Dhanieri, unodiwa zvikuru!”

²⁹ Hazvikuiti here kuti unzwe zvakanaka, kufunga kuti Mwari vanokuda? Dai ndisingadiwe zvakananyanya, ndaingoda kuziva kuti ndinoita sekudiwa zvishoma kumusoro Uko, haungadiwo here? Chokwadi. Sekungo . . . Vanofunga nezvangu, apa neapo, zvaizongondiita kuti ndingoda kudandizira, kufunga kuti Vanotombori nehanyin’ a neni. Uye tine kugutsikana kwekuti Vane hanyin’ a nesu, nekuti, “Tichiri vatadzi, Kristu akafa panzvimbo yedu,” hama. Uye, zvino, apo taive tiri vatorwa kuna Mwari, zvino akatiita kuti tiswedere pedyo kuna Mwari uye akatipa rubatso rweruponeso rwedu, rwunova, Mweya Mutsvene. Uye nekutenda imomo kunotisimudzira pamusoro pezvinhu zvenyika, uye tinofamba nepamusoro payo. Zvinobwinya. Hazvina here? Zvakanaka.

³⁰ Ari mumunamato, Gabrieri akauya ndokumuudza kuti paisangori nemamwezve makore maviri chete vasati vadzokera kumusha, asi akamuudza magumo ese enyika iyoyo. Pafungei! Magumo ese, rwendo rwese rwepanyika, Gabrieri akarwutsanangurira Dhanieri. Akati Akatumwa kunoudza Dhanieri chinhu chikuru ichi. Muporofita iyeye anofanira kuve akanzwa sei! Uye Akamuudza kuti kwaive nemavhiki makumi manomwe akatarwa pavanhu, kusvika kumagumo; ndiyo nguva yekupedzisira, saka zvese zvapera, magumo. Akati, “Kune mavhiki makumi manomwe.”

³¹ Vamwe vanoati mwedzi, vamwe mazuva, vamwe... Huh! Kana achingova mavhiki chaiwo, angori angangoita makore maviri ane chikamu chimwe kubva muzvina, kana kuti gore rimwe rine chikamu chimwe kubva muzvina. Uye, munooona, imi... Ndipo patinofanira kuwana, kutaura chokwadi.

³² “Mavhiki makumi manomwe akatemerwa kuvanhu vako.” Nechinangwa chei? Nokuda kwei? Vaive vanhu vaani aave akatemerwa? Vanhu vaDhanieri, maJudha. Uye aive akatemerwa nekuda kwei? Kwete pamusoro paDhanieri chete, asi pamusoro peguta dzvene raDhanieri; munooona, guta dzvene raDhanieri. Zvino, kirasi, guta dzvene raDhanieri raiva chii? [Ungano inoti, “Jerusarema.”—Mupepeti] Jerusarema.

³³ Uye zvino tiri kuzatora, pamwe kusvika pazviri manheru ano: Jerusarema raiva kupi? Ndiani akavamba Jerusarema? Wakambofunga nezvazvo here? Ndiani akavamba Jerusarema? Rakavambwa riinhi? Tichasvika kwazviri, mushure mechinguva. Ndiani akavamba Jerusarema? Vakomana, chinhu chidiki-diki chakavanzwa kumashure mukona, asi zvirokwasvo Rinozvitaure. Hongu, changamire. Ndiani akavamba Jerusarema, uye rakavambwa riinhi? Zvakanaka. Uye ndiro guta dzvene raDhanieri.

³⁴ Uye tinonzwisisa kuti guta iroro, iro rave chituko zvino kwemakore zviuru zviviri, richavakwa zvakare nekumiswa zvakare. Uye kunamata mutemberi kuchaitwa sezvakwaingova pakutanga. Ndizvozvo chaizvo. Jerusarema richavapo, zvino, uye pachave nechibairo, chipiriso chezuva nezuva chinopihwa zvakare sezvazvaive pakutanga. Tichapinda mune zvizhinji zvazvo, ndinofungidzira, manheru ano, kana kuti zvizhinji zvacho.

³⁵ Zvino ndinoda kuti muzive, shamwari, kuti, kubata pazvinhu izvi, zvirokwasvo ndiri kusiya mavhiki ekudzidzisa. Asi ndichingoita sekuzvirova, kuitira kuti kana mamiriro ekunze otonhorera, kana kuti gare-gare, patinopinda muZvisimbiso Zvinomwe zviya, Ndiro Nomwe dzematenda, Hwamanda Nomwe, zvinhu zvose izvi, zvandinogona kuzonongedza kumashure ndoti, “Munorangarira here mavhiki makumi manomwe aDhanieri? Munorangarira here zera reChechi, payakakwira, uye nezvakaaitika?” Uye mavhiki makumi manomwe aya aDhanieri anobata kubva pakukwira kumusoro kweChechi kusvika pakudzoka kweChechi. Chikamu ichocho chenguva ndimo maanobata. Zvino, zvino, kwete ese mavhiki makumi manomwe aDhanieri; chikamu chawo. “Mavhiki makumi manomwe akatemerwa.”

³⁶ Zvino, pakanga paine chinangwa chakapetwa katanhatu mukushanya kwaKe, achimuudza zvaizoitika. Zvino, paive nechinangwa chakapetwa katanhatu chekuuya kwaKe. Zvino, manheru ano, ndinofunga kuti tichasiira neche pano

muMagwaro apo patanga tiri mangwanani ano, apo pokuti paive nechinangwa chakapetwa katanhatu. Hezvino tiri pano. Zvino tinoona kuti paive nechinangwa chakapetwa katanhatu, chimwe chacho. Zvino ngatitorei . . . -chitsauko chechina, iyo . . . -ndima yechina . . . ndima 24 yechitsauko 9 chaDhanieri.

Uye *vhiki dzinamakumi manomwe dzakatemerwa pavanhu vako . . .*

Zvino rangarirai, ndizvo izvo zvoga rwendo rwevaIsraeri rwuchazova nazvo panyika pano. Akatemerwa. Mavhiki makumi manomwe akatongotemerwa. Ndiwo oga akatarirwa kumaJudha.

. . . *pavanhu vako nepaguta rako dzvene, . . .*

Naizvozvo, mavhiki makumi manomwe aya, zvino musazvipotse, achazarura kubva panguva iyoyo kusvika kumagumo emaJudha, uyewo zvakare kusvika kumagumo eJerusarema, kusvikira pachava neguta idzva richavakwa. Zvino, oo, ndinovimba tinopinda mazviri, zvakanaka chaizvo uye zvakadzika manheru ano.

. . . *akatemerwa pavanhu vako uye nepaguta rako dzvene, . . . (Kuitirei?) . . . kupedzisa kudarika, . . .*

³⁷ Chii chaAkamuudza zvino? Akanga achiedza kutsvaga kuti zvichitora nguva yakareba sei. “Ndinoziva kuti tave panguva yekupedzisira.” Sezvatiri zvino, “Ishe . . .”

³⁸ Vangani mukirasi ino, manheru ano, vanotenda kuti tiri panguva yekuguma? Itii, “Ameni.” [Ungano inoti, “Ameni.”—Mupepeti] Maita henyu. Tave kumagumo. Zvino tiri kuedza kutsvaga, naMwari, kuti zvichanyatsotora nguva yakareba zvakadii. Izuva ripi ratiri kurarama? Ndicho chikonzero tiri kudzokera shure uye tichitora vaporofita ava, nevamwe vakadaro, uye nekuedza kutsvaga kuti tiri papi.

³⁹ Uye ndizvo zvakaithwa naDhanieri. Akanangisa chiso chake kuna Mwari. Vangani vaverenga Dhanieri 9 nhasi? Simudzai maoko enyu. Zvakanaka. Munoona munamato wake, kuti akareurura sei achitira vanhu vake, uye nekureurura kwake pachake. Aida kuva nechokwadi chekuti aziva pavaizodzokera, nekuti aida kuita kuti vanhu vagadzirire kudzokera.

Zvino, zvandiri kuedza kuita, kutsvaga apo patiri kuenda kumusoro, uye nekuzoitwa kuti vanhu vagadzirire kuenda kumusoro, vanga vakagadzirira. Uye takanangisa chiso chedu kuna Mwari, kuburikidza neminyengetero nezvikumbiro, kuti tizive, “Ishe, inguvai yatiri kurarama mairi?”

⁴⁰ Takaona zvinhu zvese izvi zvakasiyana-siyana zvichiitika; tinoona nyika iri munyonga-nyonga. Tiri kuona nguva yava pedyo. S- . . . chinyorwa chiri pamadziro, zvese zvakataurwa naMwari. Tinonzwa Mutungamiri wedu wenyika achitaura nezve imwe hondo, iko zvino iri kuuya. Tinonzwa kufanotaura,

“Mukati, oo, mumaawa mashoma mushure mehondo, zvakafanotaurwa kuti nyika dzichasara dzava guruva rematombo akanyungudika.” Uye tinoziva kuti tinazvo.

Saka tinoziva, izvozo zvisati zvaitika, Chechi inofanira kuenda. Saka, “Ishe, tiri papi?” Ndicho chikonzero ndinotenda kuti Vachatiita kuti tizive. Takanangisa meso edu kuti tizive. Zvino, kutanga, ngationei.

*Mavhiki makumi manomwe akatemerwa
pavanhu vako...guta rako dzvene, kupedzisa
kudarika,...kugumisa chivi, uye nokuita
yananiso pakusarurama,...nokuyisa kururama
kusingaperi, ...kusimbisa chiratidzo nechiporofita,
nekuzodza nzvimbo Tsvene-tsvene.*

⁴¹ Ndicho chaive chinangwa chakapetwa katanhatu chekushanya kwaGabrieri.

⁴² Zvino ngatitangei, nhamba potsi. Kana muchida kuimaka, imi mune mapenzura. Nhamba potsi, “Kupedzisa kudarika,” ndicho chinhu chekutanga. Zvino, kupedzisa kudarika kweIsraeri, yakatadzira Mwari, ndiko kuchava kubviswa kwekushaiwa humwari kwaJakobho.

Zvino, kuti tiwane izvi, ngativhurei kuna VaRoma. Chitsauko 11 cheVaRoma, uye kutangira pandima 21 yaVaRoma 11. Zvino tava kuzodii? “Kupedzisa kudarika.” VaRoma 11:21. Zvakanaka.

*Nekuti kana Mwari asina kurega davi repo,...(Raive
ani? Israeri.)...chenjera zvichida...haangakuregi
newewo.*

Zvino, ndinoda kuti imi, kana maenda kumba, muverenge chitsauko 11 chese ichi. Ndiri kungoverenga izvi kuitira... Makai pasi chitsauko 11 chese, mobva machiverenga.

...haangakuregi.

*Naizvozvo tarira hunaku...kuomesa kwaMwari:
kune avo vakawa, ...asi kwamuri, hunaku,
kana muchigara muhunaku: zvimwewo newe...
muchagurwa, muchagurwawo zvakare.*

*Uye naivowo, kana vasingagare pakusa-...kana
vasingagari pakusatenda, vachabatanidzwa: nekuti
Mwari vanogona kuvabatanidzazve.*

Munoona, kutaura kuti pachave nenguva yekuti Murudzi achagurwa, uye Israeri ichadzoka zvakare.

*Nekuti kana imi maive makatemwa kubva pane—
kubva pane muti wemuorivhi uyo uri wemusango
pakusikwa kwawo (Marudzi), uye ukabatanidzwa
zvichipesana nemasikirwo...*

Taive takapesana nemasikirwo, vatorwa, tisina tsitsi, tisina Mwari, tisina tariro zvachose. Uye Mwari, kubudikidza netsitsi dzaVo, kuti vatipe mukana, vakagura Israeri yakarurama nekuda kwekudarika, uye ndokuvaisa parutivi, wemusa-... muorivhi munyoro, ndokuunza muti wemuorivhi wemusango, zvinopesana nemasikirwo.

...kune *wakanaka*...muti: *zvikuru sei ava, vari matavi awo, vachibatandzwa pamuorivhi wavo chaiwo?*

Zvakanaka, ngatirambei tichiverenga.

Nekuti handidi, hama, kuti musazive chakavanzika ichi, kuti murege kungwara mukuzvitutumadza kwenyu; kuti hupofu muchidimbu hwehwakaitika hweIsraeri, hunoitika kuIsraeri, kusvikira kuzara kweMarudzi...kwapinda.

⁴³ Kusvikira Mwari vapedza neMarudzi, Israeri yaiva yakapofomadzwa. Vakaenda muchivi uye nemukutadzira Mwari, nekuti Mwari vakapofomadza meso avo, kuitira kuti isu tibatanidzwe. Mazvibata here? Ndima 26 zvino:

Naizvozvo Israeri yose ichaponeswa:...

⁴⁴ Mwari vakavapofomadza nebwoni kuitira iwe neni. Havagoni kuona, nekuti Mwari vakavapofomadza. Uye Israeri yese, Israeri yechokwadi, ichaponeswa. Mutumwa akatii? Kubwinya! “Kupedzisa kudarika kweIsraeri! Ndauya kuzokudza kuti ichasvika nguva apo kudarika kweIsraeri kuchange kwapera.” Mwari vachatema bazi riya remusango, vobatanidza mune iwo, zvakare, iro bazi chairo zvakare.

⁴⁵ Oo, dzimwe nguva zvinoita kuti moyo wangu usvetuke, kuvaona vanhu ivavo vanonzwisa tsitsi, vanosiririsa vakagurwa uko, vasingazivi kwavari kuenda; uye kufunga kuti Mwari, mutsitsi dzaVo, vakazviita kuitira kuti ndiponeswe. Vakapofomadza meso avo kubva kuna Mesia wavo chaiye, vakavhara nzeve dzavo kuti vatadze kuMunzwa; asi zvakadaro, vakanyatsotarisa pamashura aKe, ndokunyatsotarisa chaipo pamashura aKe nezvinhu zvaAiita.

⁴⁶ Mateo, ndinotenda, chitsauko 12, kana chitsauko 8 kana 12, akati, “Kunyangwe Jesu akange aita zvishamiso zvakawanda kwazo, asi zvakadaro havana kukwanisa kutenda.” Nekuti, Mwari vakati, “Vane maziso uye havagoni kuona, nenzeve uye havagoni kunzwa; kunze kwekuti vaona nemaziso avo nekunzwa nenzeve dzavo, zvino ndaizovatendeutsa.” Asi, kuitira kuti tikwanise kuwana mukana, Vakadhonzera keteni pasi kumeso evana vaVo Vomene, vakadzinga vana vaVo Vomene kubva patafura, ndokuvaisa pakuondoroka paMweya, kuti Vakwanise kuwana...kuti tikwanise kuwana mukana wekurarama, vachitipa Hupenyu. Ndima 26, zvakare.

*Naizvozvo Israeri yose ichaponeswa:
sezvazvakanyorwa, Kubva paZioni pachabuda
Mudzikinuri, uye achabvisa kusava nehumwari kubva
kuna Jakobho:*

⁴⁷ Hongu, Achauya kuGomo reZioni, rimwe ramazuva ano. Pamusoro peGomo reMiorivhi, vachamuziva, uye Israeri yose ichaziva kuti ndiYe. VeMarudzi pachange pasisina chavo ipapo. Bazi iroro rakabatanidzwa, Mwari vachatora kubva pariri michero yakaunganidzwa. Uye bazi iroro remusango richazo. . .

⁴⁸ Uye zvino rangarirai, kumashure uko apo muchiverenga, Akati, “Kana midzi iyoyo yakange iri mitsvene, uye midzi iyoyo waive Mudzi mutsvene, zvakarewo muchero unobuda kubva muMudzi mutsvene iwoyo unounza muchero mutsvene.” Uye kana Mudzi iwowo waiva Jesu Kristu, Anova zvose Mudzi neBukira raDhavhidhi; kana Hupenyu ihwohwo hwaive maAri, hwakauya kuburikidza nemuchizvarwa chemaJudha uye hukagurwa kubva kwavari, uye maziso avo akapofomadzwa kuti tikwanise kuona, hupenyu hwedu huchafanirwa kufanana neBazi rakaropafadzwa iri. Oo, hongu, hama. Ndizvozvo chaizvo.

⁴⁹ Mwari vakavagura, nechinangwa, uye vakapofomadza meso avo kuitira kuti tiwane mukana wekuona, vachitipa mukana. Zvino isu tinofamba-famba tichiita kunge tiri mumwe munhu mukuru. Pauro anovaudza pano, “Chenjererai, maitiro amunozviita. Chenjererai! Nokuti kana Mwari vasina kuregera bazi repo, Vachagoita dzimwe tsitsi dziipi pabazi remusango rakatogara. . .”

Saka tinofamba-famba, tichiti, “Ndiri muPresbyteriani! Ndiri muMethodisti! Ndiri muBaptisti! Ndiri muPentekosti!” Hazvina vzazvinoreva kuna Mwari. Unofanira kuberekwa patsva neMweya Mutsvene iwoyo unobva muMudzi. Asi Akauya. . .

⁵⁰ Zvino, rangarirai, Haasi kutaura pamusoro peMarudzi. Ndiri kungokanda izvi imo muno kuti muone kuti Marudzi vane mukana wavo papi.

⁵¹ Asi, Akauya “kupedzisa kudarika,” kuita kuti kupere. Zvino, kana tikadzokera muna Dhanieri zvakare, uye tichazoona kuti muna Dhanieri, tinoona pano, ndima 24. Zvakanaka. “Kupedzisa kudarika.” Kupedzisa chii? Kupedzisa kudarika kweIsraeri.

Kudarika chii? Kuenda uchipesana nechimwe chinhu. Kundikanganisira, kunditira zvakaipa. Kukukanganisira, kukuitira chakaipa.

Saka, Israeri yakaitira Mwari zvakaipa. Uye muvhiki rino rechimakumi manomwe, chii chichaitika? Mwari vari kupedzisa kudarika kweIsraeri. “Kupedzisa kudarika,” kuchava, “kubvisa kushaiwa humwari kuna Jakobho.” Uye ipapo Israeri yose

ichaberekwa patsva. Vese zvavo vachagamuchira Mweya Mutsvene.

Zvino, nhamba yechipiri, nyorai izvozvo pabepa renyu.

⁵² Tinogona kugara kwenguva yakareba pazviri, asi handisi kuda kutanga kuparidza pazviri. Ndinongoda kutaura nemi, kuitira kuti mugone kuzvibata nepedyo. Kana tapinda muZvisimbiso Zvinomwe izvi, ipapo munozongoramba muchipfuurira mberi nemuChechi, nemuZvisimbiso, nemuMatambudziko, nekuziva patakamira. Zvakanaka.

⁵³ Nhamba yechipiri, “Kugumisa zvivi.” Zvino ngativerengei zvakare, Dhanieri.

. . . kupedzisa . . . kudarika, ne—nekugumisa zvivi, . . .

Ndicho chinangwa Chake chechipiri chekuuya. Kutanga, ndiko kupedzisa kudarika kweIsraeri; uye nekugumisa zvivi. Israeri yakatadza papi? Ndepapi pavakaita chivi chavo chikuru? Ndepapi pavakazvipatsanura kubva pana Mwari?

⁵⁴ Zvino nyatsoteererai. Ngativhurei kuna Mutsvene Mateo 24. Uye hepano apa Israeri payakaita mhosho ine rufu. Hepano payakaita chivi chayo chekupedzisira, nechikonzero iri muchinhano chairi nhasi. Mateo, chitsauko 27 cheVhangeri raMutsvene Mateo, uye ndima 25 yechitsauko 27. Ngatitangirei sepandi—ndima 21.

Mubati akapindura akati kwavari, Ndeupi wevaviri wamunoda kuti ndikusunungurirei? Zvino vakati, Bharabhasi.

Zvino rangarirai, iIsraeri. “Bharabhasi!”

Pirato akati kwavari, Ndichagoiteiko . . . naJesu anonzi Kristu? (Teerera kwavari!) Vose ndokuti kwaari, Ngaarovererwe pamuchinjikwa.

Rangarirai, ndiye Mesia wavo akataurwa naDhanieri kuti achauya. Rangarirai mangwanani ano, muchidzidzo pano, “Achagurwa, kwete nekuda kwaKe,” pasina chaAkaita.

. . . Ngaarovererwe pamuchinjikwa.

Zvino mubati akati, Nei, chii chakaipa chaakagoita? Asi vakanyanyisa kudandzira, vachiti, Ngaarovererwe pamuchinjikwa.

Ipapo Pirato achiona kuti hapana chaachakwanisa, asi . . . kuti pakamuka bope, zvino akatora mvura, akashamba maoko ake pamberi pemhomho, achiti, Handina mhaka neropa remunhu uyu akarurama: zvionerei . . . imi.

⁵⁵ Teerera! Heino mhosho yavo. Hechino chivi chavo.

Ipapo vanhu . . . vakapindura, vakati, Ropa rake ngarive pamusoro pedu, uye nepavana vedu.

⁵⁶ Ndipo pachu pavakazviitira. Akanga ari kugumisa chivi kwavari. Chii chimwe chinhu chaAigona kuita kunze kwekuvaregerera, achiziva kuti Aifanira kupofomadza maziso avo, kuti tigokwanisa kupinda? Zvakaita sevana vaKe pachaKe vachichemera Ropa raKe. Zvino vaive vakapofomadzwa, uye Akaziva kuti vakapofomadzwa. Ndicho chikonzero Akachemera kuti varegererwe. “Varegerereiwo, Baba, nekuti havazivi zvavari kuita.” Vakanga vari mapofu. Nekuda kwedu vakaitwa mapofu. Mukusatenda kwavo vakazviita izvi. Asi pavanoMuona zvakare...Ameni!

⁵⁷ “Kugumisa chivi.” Chivi chii? Kusatenda. Havana kutenda kuti aive Mesia. Havana kukwanisa kuMuona ari Mesia, asi Akaita chiratidzo chose chaifanira kuitwa naMesia. Asi havana kukwanisa kuzviona. Vakanga vari mapofu.

⁵⁸ Saka kana mukaona vanhu vachiti, “Handitendi mukupodza kwaMwari. Handikwanise kuzviona. Handikwanise kuona rubhabhatidzo urwu rweMweya Mutsvene.” Usavatsamwire; ivo mapofu. Vanoti, “Handikwanise kuona Mharidzo ino yeKuuya kwaKe. Handikwanise kuona rubhabhatidzo urwu rweMweya Mutsvene. Handikwanise kuona mbeu yenyoka. Handikwanise kuona zvinhu izvi.” Mapofu, uye havazvive. Chingovanamatira. Zvakanaka.

⁵⁹ Mukusatenda kwavo; asi, pavanoMuona, paAnouya zvakare, zvichagumisa kusatenda kwavo. Oo, ini zvangu! Ngatimbovhurei kutanga kuna Genesi 25, chitsauko 45, uye titore mu—mufananidzo wazvo. Ndanyora pasi zvimwe pano, zvaGenesi 45, imi muri kutora zvinyorwa. Oo, ndinoda sei Vhangeri rino rakare rakanaka! Zvakanaka. Zvino tava kuziva patiri.

Muri kundinzwa zvakanaka here, kumashure kwechivakwa? Simudza ruoko rwako kana uchindinzwa. Ndagadzika ichi pedyo-pedyo.

⁶⁰ Zvino tava kuzoverenga chikamu cheRugwaro urwu. Ndinoda kuti muteerere, imi musina Bhaibheri renyu. Imi mune Bhaibheri renyu, ndiGenesi. Kutanga, ngatitangirei muchitsauko 44, kutanga nendima 27.

⁶¹ NdiJosefa, uye Josefa aive mufananidzo wakakwana waKristu. Tinozviziva izvozvo. Vangani vanozviziva izvozvo? Akavengwa nevakoma vake. Nei? Nekuti aive wemweya, aiona zviratidzo, achidudzira hope. Aive munhu wemweya pakati pevakoma vake, uye vaimuvenga. Uye baba vake vaimuda.

Naizvozwowo Jesu aivengwa nemachechi emasangano, asi aidiwa naBaba vaKe Mwari. Sei vaiMuvenga? Nekuti Aive wemweya. Nekuti... Vakataura, vakati Aiva muuki, dhimoni.

⁶² Munorangarira here zvakaturwa nevakoma vaJosefa kwaari? “Heuno anouya muroti uya.” Maona? Munoono, chinhu chimwe chete. Zvino vakatengesa Josefa nemutengo

unenge mumwe chete uyo Judhasi akatengesa Jesu nawo, masirivheri makumi matatu. Vakamukandira mugomba, ndokuenda kunoudza baba kuti chimwe chinhu chamuuraya, ainge afa. Asi akatorwa kubva mugomba. Kristu akakandwa mugomba, ndokusimudzwa. Uye kubva ipapo akaenda kunzvimbo yepamusoro-soro yaive panyika. Amen! Josefa akaenda kuruoko rwerudyi rwaFarao; uye Jesu akaenda kuruoko rwerudyi rwaMwari. Mumuyedzo wake, asati asimudzirwa. . . Jesu, Asati asimudzirwa, akapfuura nemumuyedzo.

⁶³ Handiti, ndinotenda kuti aive Billy Sunday, muvhangeri mukuru, akati, “Muti wese—wese waive neNgirozi miriyoni dzakagara mauri, zuva iroro rekuroverwa, dzikati, ‘Chingosunungura ruoko rwaKo wonongedza kwatiri. Tinoshandura mamiriro ezvinhu ari pano.’” Asi haAna kukwanisa kuzviita.

⁶⁴ Kayafasi akati, “Akazviponesa; vamwe haagani kuponesa.” Aisaziva kuti aitopa chitaurwa chakanaka. Dai Akazozviponesa pachaKe, haAizogona kuponesa vamwe. Saka, Akazvipa pachaKe, kuti aponese vamwe. Munoono, vakapofomara zvakananyanya pazviri. Zvino ivo. . .

⁶⁵ Zvino paakanga ari ipapo mukusimudzirwa kwake, kana kuti, asati asimudzirwa, muedzo wake. . .Rangarirai, Josefa akaiswa mutirongo nekuti akange asina mhaka.

⁶⁶ Mutungamiriri wehondo yechiRoma, kana, yeIsraeri, ainzi Potiferi; Potiferi akaenda, ndokuenda parwendo. Aive nemudzimai ane runako, zvino mudzimai wake akaita kuti Josefa apinde mumba kuzoitwa chimwe chinhu, zvino akaedza kuita kuti Josefa aite chimwe chinhu chisina kunaka. Asi akanga akavimbika kuna Mwari. Ndinokutaurirai, ivo nguva dzose. . .

⁶⁷ Imi madzimai, ndakakupoterai; zvino ndava kumira nemi, kwechinguvana. Maona? Mudzimai ndiye mudziyo mutete. Ndinoziva kuti hakugone kuva nemurume akaipa pasati pava nemukadzi akaipa. Asi varume vanozviziva izvozvo, varume vanoziva kuti iwe uri mwanakomana waMwari, watora mukana pamudzimai, nonyadzisa; zvisinei nezvaanoita. Iye mudziyo mutete, uye unozviziva izvozvo. Kana akabuda, achizvibata zvisina hunhu hwechidzimai, mubate neruoko wotaura naye sehanzvadzi. Uri mwanakomana waMwari. Usaite zvinhu izvozvo zvakaipa. Tarisa kuna Josefa, aiva muenzaniso kwauri.

⁶⁸ Zvino apo mudzimai waPotiferi, mudzimai uyu tsvarakadenga, anoremekedzwa, wepamusoro-soro, mumwe wemadzimai epamusoro-soro aive munyika, akamugombedzera uye akamunyengetedza. Zvino akatendeuka, uye mudzimai akamubata ndokuedza kumumbundira kwaari. Zvino akazvizunza kusvikira iye atobvisa jasi rake, ndokumutiza. Hongu, changamire. Zvino paakapinda, vakamunyepera, ndokuti auya muno kuti amubate chibharo, zvino akasiya

rake . . . zvino akasiya jasi rake ipapo. Uye nekuda kwaizvozvo akaenda mutirongo. Asi, mutirongo, Mwari vaive naye, zvisinei nekuti vamuisa kupi.

⁶⁹ Aive mufananidzo weMwanakomana webudiriro. Zvese zvakaitwa naJosefa zvakabudirira. Uye Jesu paanodzoka muMireniyamu, ndicho chikonzero magwenga achatumbuka seruva rerozi. Zvese zvaAnoita zvichabudirira. Ndiye Mwanakomana webudiriro. Chero kupi kwawaiisa Josefa, kwaive kwakaropafadzwa. Chero kupi kuna Jesu, kwakaropafadzwa. Saka, Mupinze mumoyo mako uropafadzwe.

⁷⁰ Saka tinoona zvino, kuti, Josefa ipapo akazobva aiswa mutirongo. Zvino mutirongo makanga muine varume vaviri; mumwe wavo akarasika, uye mumwe akaponeswa. Jesu, mukuyedzwa kwaKe pamuchinjikwa, imwe mbavha yakarasika uye imwe ikaponeswa.

⁷¹ PaAkasimudzirwa, Akaenda kuruoko rwekurudyi rwaMwari. Josefa paakasimudzirwa, akaenda kuruoko rwekurudyi rwaFarao, uye hapana munhu aigona kutaura naFarao asina kutaura naJosefa kutanga uye nekuwana mvumo.

Zvino Josefa paakasiya muzinda . . . Oo, ini zvangu! Josefa paakabva pamuzinda, hwamanda dzakarira, uye varume vakamhanya mberi kwake, vachiti, “Pfugamai! Josefa ari kuuya!” Ameni!

Uye Jesu paanobva paruoko rwekurudyi rweHumambo kumusoro, hwamanda dzicharira. Zvino ibvi rose richapfugama, uye rurimi rwose rwuchapupura, “Jesu ari Kuuya!” Chokwadi! Asi kana . . .

⁷² Uye, rangerirai, paakarambwa nehama dzake, akaitei? Akawana mudzimai Murudzi; akawana mudzimai muEgipita. Jesu paakagurwa kubva kuhama dzaKe kumashure uko, maJudha, Akaroora Mwenga weMarudzi. Asi zvino, mushure memakore, mushure mekunge vana vaberekwa, Efraimi naManase, akave nemhuri.

⁷³ Zvino, rimwe zuva, vakoma vake vakauya kuzomushanyira. Tarisai. Tinoziva nyaya yacho, kuti akaisa sei chinhu chidiki mukati imomo, kuti adzosere. Uye akaita sekunge aisakwanisa kana kutaura mutauro wavo; aive nemuturikiri, wekuchiHebheru, apo iye aiva muHebheru pachake. Uye munin’ina wavo akanga auya zasi. Havana kumuziva. Aiva muchinda ane simba.

Uye izvozvi, Kristu anoshanyira maJudha, anopodza varwere vavo nezvimwewo, uye zvakadaro havazive kuti ndiYe Ani, Mesia uya.

Ngatitangirei pandima 27 yechitsauko 44.

Uye muranda wenyu baba vangu vakati kwatiri, Munoziva kuti mukadzi wangu akandiberekeramukadzi wangu akandiberekeravanakomana vaviri:

Zvino mumwe wavo akabva kwandiri, . . .

Aiva Josefa, iye wacho chaiye wavaitaura naye.

. . . uye ndikati, Zvirokwazvo akabvamburwa kuita zvimedu; uye kubva musiiwoyo handina kuzomuonazve:

Zvino kana mukanditorera neyuwo, zvino akawirwa nenjodzi, muchaburutsira vhudzi rangu jena kubwiro nekusuwa.

⁷⁴ Vaive naBhenjamini mudiki zasi ikoko, munin'ina wake mudiki. Munoziva here uyo anomiririrwa naBhenjamini? Iri boka remaJudha chaiwo, echokwadi riri kuungana ikoko zvino kuita izvo zviuru zana zvinemakumi mana nemana, rudzi urwu—urwu rwuri kuuya. Kwete makoronyera aya ekuWall Street, kwete, kwete; ndevamwe vachazova sora richatsva. Ivavo havasi maJudha. Havasi maJudha. MaJudha chaiwo ndivo vanaBhenjamini vadiki ava vari kuuya vachibva zasi kuno, uye vasina kana kutombonzwa Shoko raJesu Kristu.

Naizvozvo zvino huyai kwandiri. . . nababa venyu. . . uye baba vangu, uye tisinaye mukomana; nekuona kuti hupenyu hwavo hwakasungirirwa muhupenyu hwemukomana;

⁷⁵ Hupenyu hwaMwari pachaVo hwakasungirirwa pamwe neIsraeri. Vakaroozana nayo. Tichasvika pane izvozvo mumaminitsi mashoma, kana Ishe vachitendera. Vakaroozana neIsraeri. Hupenyu hwaVo hwakasungirirwa kwairi. Sekubatanidzwa kwandakaitwa kuna Mai Branham vari kumashure uko, mudzimai wangu, uye wakabatanidzwa nemudzimai wako. Hupenyu hwenyu hwakaputirwa mazviri. Uye Mwari vakaroozana neIsraeri. Uye chaive chii? Jakobho akati, "Hupenyu hwangu hwakaputirwa nekusungirirwa mumwana yu. Ndicha. . ."

Zvino zvichaitika kuti, vachiona mukomana asinesu, . . .

Josefa ainge ari kuzochengeta mukomana, munoziva. Tinoziva nyaya yacho.

. . . uye kuti vachafa, baba vake: uye varanda venyu vachaburutsira bvudzi jena romuranda wenyu baba vedu nekusuwa kubwiro.

Teereraiki kune chikumbiro icho Rubheni ari kupa zvino.

Nekuti muranda wenyu ave rubatso kuti mukomana kuna wenyu. . . kuna baba vangu, ndikati, Kana

ndikasaunza...ndikasauya naye kwamuri, ipapo ndichava nemhosva kuna baba vangu nokusingaperi.

Naizvozvo zvino, ndinokukumbirai, kuti muranda wenyu agare hake pachinzvimbo chomukomana...

Oo, ini zvangu! Munoono, akamira pamberi chaipo paJosefa, munin'ina wake. Uyu ndiJosefa, asi haasi kumuziva. Oo, mirira kusvikira Mireniyamu iyoyo yatanga, hama!

...zvino pachinzvimbo chemukomana muranda washe wangu;...

Muteererei, achimupupura kuti, “*ishe.*”

...uye regai mukomana adzokere nevakoma vake.

Nekuti ndingakwira seiko kuna baba vangu, ndisina mukomana? zvimwe ndirege hangu kuona njodzi ichawira pana baba vangu.

⁷⁶ Achiteterera, achipa hupenyu hwake pachake! MaJudha iwayo achamira ipapo sei vakasimudza maoko avo! Tarisai. Tarisai zvino ndima, yechi 45...Teereresai, musazvipotse. “Apo Josefa paaikwanisa...”

Zvino Josefa haana kugona...-zvidzora—kuzvidzora pamberi pevose vakange vakamira pamwe naye;...

Hama, ndipo pachagumiswa chivi. Kusatenda kuchamwararika.

...zvino akadanidzira, akaita kuti vanhu vose vabve...kubva kwandiri. Zvino kwakanga kusina munhu akamira naye, apo Josefa achizvizivisa kuhama dzake.

⁷⁷ Chii? Kunyange mudzimai wake chaiye akadzokera kumuzinda. Oo, ini zvangu! Mwenga uri Mukubwinya, apo Jesu achidzoka (Tichapinda mazviri pano.) kuti aZvizivise.

Zvino akachema kwazvo:...

Josefa akange asingachakwanise kuzvibata zvachose, zvino akaridza mhere.

...zvino vaEgipita neveimba yaFarao vakazvinzwa.

⁷⁸ Kumashure-shure uko mumuzinda, vakanzwa Josefa achiridza mhere. Zvino, waiva mufananidzo waKristu achisangana nemaJudha, apo, Anoziva kuti Akavapofomadza kuitira kuti tikwanise kuwana mukana. Asi paAnouya kwavari zvakare, chivi cheIsraeri chinobva chapera.

Zvino Josefa akati kuhama dzake, Ndini Josefa;...

Munofunga kuti Jesu achati kudii? “Ndini Mesia wenyu. Ndini Uyo wamakaroverera pamuchinjikwa.”

...ko baba vangu vachiri vapenyu here? Zvino vakoma vake vakasagona kumupindura; nekuti vakashushikana nemataridzikiro ake.

⁷⁹ Oo, ndinofanira kumira pano kwechinguvana. Ngativhurei kuna Zakaria chitsauko 12. Vhurai neni zvino kuBhuku raZakaria, chitsauko 12 chaZakaria. Uye pamwe ndiri kutora nguva yakawandisa mukutanga kuparidza pane izvi, asi handi—nditarire kudaro. Uye ndi—ndinoda kuti muzvibate, zvakanyanisa.

⁸⁰ Zakaria, ngatitorei chitsauko 12 chaZakaria, uye tione zvaAchataura zvino paAnomira pamberi pehama dzaKe. Zekaria 12, neyechi 10. “Kugumisa chivi,” zvino. Zvakanaka, chitsauko 12 nendima 10.

⁸¹ Cherechedzai. Uye zvino ari kutaura pano nezve vakasara; kukombwa kweJerusarema; chikara nematico zvinobviswa, nezvimwe zvakadaro; zvinhu zvese zvasvika kumagumo zvino; izvi zvave kuda kusvika kuMireniyamu, kugadzirira kutanga Mireniyamu iko zvino.

*Uye ndichadurura pamusoro peimba yaDhavhidhi,
nepahugaro hweJerusarema, mweya we (chii?)
nyasha...*

Ameni! Nyasha dzinoshamisa!

*...pamusoro peimba...vagari vemuJerusarema,
("guta dzvene" raDhanieri), mweya wenyasha
newekunyengerera: uye vachanditarira ini
wavakabvowora, uye vachamuchema iye, semunhu
anochema mwanakomana wake mumwe chete, uye
vachave neshungu kwazvo pamusoro pake, somunhu
ane shungu pamusoro pemwana wake wedangwe.*

⁸² Teerera, kuchave nekuchema kwakadini ikoko paAnenge akamira ipapo, achiZvizivisa kwavari, sezvakaite Josefa! Teerera.

*Uye nezwa iroro pachava nokuchema kukuru
muJerusarema, sokuchema kweHadhadhi-...*

Handikwanise kududza zita iro, H-a-d-h-a-d-h-i-r-i-m-o-...

...Hadhadhirimoni mu...Megidho—Megidho.

*Uye munyika muchava nekuchema, mhuri imwe
neimwe iri yoga; mhuri yemba yaDhavhidhi iri yoga,
nevakadzi vavo vari voga; nemhuri yeimba yaNatani iri
yoga, nemhuri dzavo vari voga;*

*Iyo...imba yaRevhi...nevakadzi vavo nemhuri vari
voga;...naSimiyoni neyavowo vari voga;*

*Nemhuri dzese dzakasara, mhuri yega-yega...uye
nevakadzi vavo vari voga.*

⁸³ Vachazvinyarira kwazvo, pavachamira ipapo nekuona izvo kuti Iye chaiye wavakaroverera nekuramba, akamira ipapo,

Josefa wavo chaiye anokosha. Kuchave nekuchema kwakadaro! Uye vachati, “Wakawanepi mavanga ayo?”

⁸⁴ Akati, “Mumba meshamwari dzaNgu.” Munoono zvandinoreva? Kugumisa chivi, chekusatenda, ndizvo zvaAchavinga.

⁸⁵ Uye gore iri rechimakumi manomwe raDhanieri, vhiki rechimakumi manomwe, waro, kuuya kuzogumisa chivi, kuchibvisa. Manzwisisa zvino? Chii chekutanga? “Kupedzisa kudarika.” “Kugumisa chivi.” Nhamba yechitatu, “Kuyananisira kusarurama.” Imi muri kuzvinyora pasi.

Ndanga ndiine mamwe Magwaro matanhatu ipapo, asi ndangozvifpura, nekuti kuri kupisa. Hatidi kutora nguva yakawandisa. Ndiri kuda kutora zvakananda zvacho sezvandinogona, asi kwete kukuchengetai kwenguva yakarebesa. Zvakanaka.

⁸⁶ “Kuyananisira kusarurama.” *Kusarurama* “kuita zvisirizvo,” sezvavakaita pamuchinjikwa. Akaita yanaiso, asi inenge isinei navo. Yakanga isinei navo. Sei? Nekuti vaive vakapofomadzwa uye vakatadza kuiona. Uye seiko vakapofomara?

Unoti, “Saka, pamwe, nhasi . . . nekuti ndiri bofu.” Uri bofu nekutoda kwako. Vaive mapofu nekuti Mwari akavapofomadzwa. Asi iwe uri bofu nekuti uri bofu nekutoda kwako. Hakuna yanaiso kwauri. “Kana usingatendi kuti Ndini Iye,” akadaro Jesu, “uchafira muchivi chako.” Ndizvozvo chaizvo.

⁸⁷ Zvino ngatidzokerei kuna Zakaria zvakare, chitsauko 13. Zvino ngatiteererei pano. “Kuyananisira.” Zvino, uko izvi . . . Ndanga ndichitsvaga mumwe munhu, inzwa izvi—inzwa izvi, asi pamwe Ishe vachazviwana neimwe nzira.

Nezuva iroro pachave . . .

⁸⁸ “Nezuva iroro.” Chiremba Scofield vanazvo pano muzvinyorwa zvavo zvemuzasi, kana misoro yendima dzavo, “Vakasara . . .Vakasara vakatendeuka vakanongedzera kumuchinjikwa.”

⁸⁹ “Kuyananisira kusarurama.” *Kusarurama* ndicho “chimwe chinhu chawakanganisa, chawanga uchiziva zviri nani, kuti hawaifanira kunge wachiita.” “Kana ndikavanza kusarurama mumoyo mango, Mwari havandinzwi.”

⁹⁰ Zvino, muna Zekaria chitsauko 13, ngatitangei pana 1—pandima 1.

Nezuva iroro pachave netsime rakavhurwa muimba yaDhavhidhi uye kuvagari vemuJerusarema nekuda kwechivi uye . . .netsvina.

⁹¹ Pachava neimba yakazaruka. Toenderera mberi; taigona kungoiverenga tichidzika. Ndinoda kuti munyore izvozvo pasi

kuitira kuti muzoiverenga. Asi zvino, ndakanyora pano kuti nditange pandima 6 ndoverenga kusvika pana 10. Zvakanaka, ngativerengei uye zvino tione, kuverenga kusvika pana 9, waro.

Uye mumwe achati kwaari, kuti apo . . . Ko maronda api aya ari muruoko rwako? Ipapo achapindura, Ayo . . . andinawo aive . . . (Ngationei.) . . . pindura, Ayo andakakuvadzwa mumba meshamwari dzangu.

Muka, iwe munondo, urwe nemufudzi, nemunhu anova shamwari yangu, ndizvo zvinotaura JEHOVA wehondo: rova mufudzi, uye makwai agopararira: uye ndichatambanudzira ruoko rwangu kuvaduku.

⁹² Zvino, Jesu akanokora Rugwaro irworwo. Munoono, “Rova Mufudzi, zvino ugoaparadzira makwai.” Asi cherechedzai ndima inotevera. Akangotaura zvakadaro bedzi nezvazvo. Asi tarisai mutsara unotevera wacho unotii, chikamu chinotevera chawo. “Zvino ndichatambanudzira ruoko rwaNgu kuvaduku.” Chii? Boka raBhenjamini riri kuuya zvino. “Ndichatambanudzira ruoko rwaNgu kuvaduku.”

⁹³ “Rova Mufudzi.” Israeri, kutanga, Israeri yakarova Mufudzi, ikaparadzira makwai pasi rose. Asi Mwari vakati, “Ndichatambanudzazve ruoko rwaNgu, kuti nditore vadiki ivavo pazuva rekupedzisira.” Riinhi? Kana kuyanansira kusarurama kwaitika.

⁹⁴ Israeri ichaponeswa, mumwe nemumwe wavo. Ngativhurei kuna Isaya. Isaya, chitsauko 66 chaIsaya, uye toverenga kwechinguvana. Uye tione zvinotaurwa naMwari pamusoro peIsraeri ichiponeswa, zvinotora nguva yakareba sei kuponesa Israeri. Tarisai kuti zvichakurumidza kuuya sei. Muna Isaya, chitsauko 66 uye ndima 8. Kana muchida kuiverenga yese, zvakanaka.

Ndianiko akambonzwa chinhu chakadai? ndiani akamboona chinhu chakadai? Nyika ingaitwa here uye igobereka . . . zuva rimwe . . . nezuva rimwe here? . . . nekuti Zioni payakarwadziwa, ndokubereka vana vayo.

⁹⁵ Zioni payakangoona kuti aiva Mesia wayo, yakazvarwa patsva, nezuva rimwe chete. “Kuyanansira zvivi, uye nekuyanansira kusarurama, hutsvina.” Oo, ini zvangu! Vakaita izvo zvaive zvakaipa, izvo zvaive zvisina kunaka. Kuyananswa kwakaitwa nekuda kwekusarurama kwavo.

⁹⁶ Nhamba yechina. “Kuunza kururama kusingaperi.” Ndicho chinhu chechina chaAkauya. Chechina, zvaAkauya kuzoita, “Ku—kuunza kururama kusingaperi.” “Kugumisa chivi; kuyanansa; nekuunza kururama kusingaperi.” Kudarika kweIsraeri pakwakasvika pakuguma . . . Apo kudarika kweIsraeri . . .

⁹⁷ Zvino tiri kuzo...Ndinoda kuti mubate izvi, nekuti patinounza mudzimai uya, uye nechikara chadzingwa, unozodzoka paRugwaro rwumwe chete urwu zvakare. Iva nechokwadi chekuRwunyora pasi. Kudarika kweIsraeri pakwakasvika kumagumo, Satani, anova mupomeri wavo uye nemupomeri wedu, Satani achavharirwa mugomba risina hwaro. Kana chii? Pakuunza kururama kusingaperi, chimwe chinhu chisingagone kuguma, zvese zvakakonzero kusarurama zvichabviswa.

⁹⁸ Ngatitorei Zvakazarurwa chitsauko 20 nendima 13, kwechinguvana chete, uye ngativerengei pano kwekanguva. Zvakazarurwa 20, na 13...Kwete, ndiregerereiwo. Zvakazarurwa...1 kusvika kuna 3, ndizvo. Handina kuona mucherechedzo mudiki uya pakati pawo. Dikita rangu pano rinopinda mumaziso angu. Zvakazarurwa chitsauko 20, uye regai tione.

Zvino ndakaona mutumwa achiburuka kubva kudenga, aine makii egomba risina hwaro nengetani huru muruoko rwake.

...akabata shato, nyoka iya yakare, anova dhiyabhore, uye naSatani, akamusunga kwechiuru chamakore,

Ndokumukandira mugomba risina hwaro, akamupfigiramo, uye akaisa chisimbiso pamusoro pake, kuti arege kuzonyengerazve rudzi zvachose, kusvikira makore chiuru apera: zvino mushure maizvozvo... anofanira kusunungurwa kwechimguva chidiki.

⁹⁹ Kugadzira kusingaperi... "Kuunza kururama kusingaperi," Satani ari mugomba risina hwaro. Uye paAnozviita izvozvo, oisa opfigira dhiyabhore uyo akanyengera vanhu.

¹⁰⁰ Zvino ngatidzokerei kuna Habhakuki, chitsauko 2. Habhakuki, chitsauko 2. Uye zvino tichaona kuti sei Akapfigira nyoka iyi yakare, uye kuti zvakaitirwa chii, uye chii chinoitika pakarepo mushure mekunge apfigirwa. Ndinozvifarira izvi, hamudarowo here? Zvi—zvinotisvitsa pane ruzivo rwezvimwe. Habhakuki, Habhakuki, chitsauko 2 nendima 14, ndinotenda kuti ndiyo, ndinoda kuverenga. Kana izvi zvaitika... Tarisai.

Nekuti nyika ichazadzwa nezivo uye nekubwinya kwaJEHOVHA, semvura dzinofukidza gungwa.

¹⁰¹ *Brrrrr!* Ini zvangu! *Fiyuu!* Nemamwe mashoko, kana muvengi achinge abviswa, kupera kwechivi kwauya, kuunzwa kwekururama kusingaperi kwauya, Satani akapfigirwa mugomba risina hwaro, uye ruzivo rwaShe rwuchafukidza nyika semvura dzinofukidza gungwa. Amen! Mbiri kuna Mwari! Kuri kuuya, hama, kuri kuuya! Vakadzi vachava madzimai kwawo, uye varume vachava machinda kwawo. Amen!

Kana ruzivo rwaShe rwazadza nyika
 negungwa nedenga;
 Uye, oo, moyo wangu uri kugomera,
 uchichemera zuva iroro rwerusununguko
 rwunotapira,
 Apo Jesu wedu achadzoka panyika zvakare.

¹⁰² Amen! Zvakanaka. Zvino, Mireniyamu ipapo inenge yavepo. Ndipo apo Mireniyamu, apo Guta richazovakwa. Chechina...Ndine mamwe Magwaro matanhatu, asi tichakurumidza. Zvino, kana tadzoka, ndichatora mamwe Magwaro aya; asi kungokupai mamiriro acho asiri muhudzamu.

¹⁰³ Nhamba yechishanu. “Kusimbisa chiratidzo nechiporofita.” Munoono, Mutumwa uya akauya kuzoisa chisimbiso pachiratidzo nepachiporofita.

Ndi—ndinovenga kutaura izvi. Asi, mumwe munyori mukuru, wandakanga ndichiverenga nezvake rimwe zuva, ndokunge kana asina kuzvivhiringidza! Akatati “Zvachaive chiri...”

Zvino, kungoratidza kuti kupusa kwakadini...Oo, ndiregerereiwo, handirevi kutaura izvozvo. Ndiregerereiwo. Handireve izvozvo, chaizvoizvo ndanga ndisingadaro. Kwete. Mu—mu—munhu asina chizoro, munoono.

Murume wacho akati, “Munoono pano kuti zviratidzo uye nechiporofita zvaigara zvichibvumidzwa kucheche yechiJudha.” Ndokuti, “Kubva panguva yaDhanieri zvichienda mberi, pakauya Dhanieri, zvaireva kuti havaizove nechiratidzo zvakare kana chiporofita zvakare.” Ndokuti, “Zvinhu zvese izvi nhasi zvanotaura nezvazo, pamusoro pekuva nezviratidzo uye nechiporofita, zvese zvaive chinhu chadhuyabhore,” kuti, “pakanga pasina chinhu chakadaro sezviratidzo nechiporofita.”

Hama, paive nevaporofita vakawanda mushure maDhanieri. Uye kwaive naJohane Mubhabhatidzi. Kwaiva naJesu Kristu. Kwaiva nevaporofita nemuTestamende Itsva. Kwaiva nezviratidzo. Kwaiva neNgirozi.

Ko munhu angataura zvakadaro chirudzii? Asi, munoono, zvine chinangwa cheundini, kuyedza kusundira chimwe chinhu pamusoro pevanhu, kuzviita dzidziso diki yecheche, kana chinhu chidiki chisina maturo, kuti chive chechokwadi kuvanhu. Uye kana vanhu vasina Mweya Mutsvene, vanozonyengerwa nazvo.

¹⁰⁴ Zvino, ngatiregei kutora zvakataurwa nemumwe munhu. Zvino, hapana Rugwaro rwunoratidza izvozvo. Saka ndaizozvitora sei izvozvo? Saka, ngationei kuti chii chaizvo chiri kuiswa chisimbiso. Tarisai! Akauya kuzozviita izvozvo, kuti asimbise chiratidzo nechiporofita.

¹⁰⁵ Zvino, ngatimbodzokerei kuBhuku raDhanieri, kwatanga tiri. Uko muBhuku raDhanieri, tichaona zvaRakataura. Zvino

ngativhurei kuna Dhanieri chitsauko 12. Zvino, patinosvika kuna Dhanieri 12, zvino, tinogona kutanga. Uye toverenga kubva... Pamunoenda kumba, ndinoda kuti muverenge kubva pandima 1 zvichienda mberi. Ngatingoverengai kubva pandima 1, zvichidzika kune yechi 4.

Zvino nenguva iyoyo Mikaeri achamira... muchinda mukuru achamirira vana vevanhu vako:...

Zvino, izvi zviri panguva yekupedzisira.

...uye ichavapo nguva yekutambudzika, isina kumbobvira yavapo kubva... nyika...

Ndipo apo antikristu, mutasvi weChisimbiso Chekutanga anobuda, paanoitika.

... kunyangwe kusvika panguva ino:...

Kwete panguva iyo apo Tito akatora masvingo eJerusarema. Paingova panzvimbo imwe chete. Tarisai apo antikristu uyu, muchinda uya aifanira kuuya, tarisai paanouya.

... kunyange kusvika panguva imwe chete: nenguva iyoyo vanhu vako vachadzikinurwa, ivo vose avo vachawanikwa vakanyorwa mubhuku.

Hareruya! “Vanhu vako,” Israeri, “vachanyorwa mubhuku.”

Zvino vazhinji vevavete muguruva renyika vachamuka, vamwe kuhupenyu husingaperi, nevamwe mukunyadziswa nekuzvidzwa kusingaperi.

¹⁰⁶ Ko zvaigona kuva zvakadaro chirudzii kuti pave apo Tito paakatora masvingo eJerusarema? Paigona kuva pari ipo sei? Hapaigona kuve ipapo. Munoono, ari kutaura nezve nguva yekupedzisira, parumuko. Ndizvozvo here? Zvino:

Zvino avo vakachenjera vachapenya sokupenya kwekudenga; uye avo vanotendeutsa kubva... vanotendeutsa vazhinji mukururama... nyeredzi nokusingaperi...

Teererai! Hekunoi uku, kusimbiswa chaiko, kwechokwadi.

Asi iwe, O Dhanieri, pfigira mashoko, uise chisimbiso pabhuku, kunyangwe kusvikira kunguva yokupedzisira:...

¹⁰⁷ Chii ichocho? Oo, hareruya! munozviona here, kirasi? Chizaruro ichi chaJesu Kristu, uye necheSimba raKe, cheKuuya kwaKe, chenguva yekupedzisira, chakapfigwa kusvikira panguva ino. Ndizvo zvaAkauya kuzoita. Zvakavanzwa kubva kune nyanzvi dzedzidzo; ndosaka vachida kuisa, “kuisimbisa,” kumashure-shure uko, “kusina vaporofita,” uye zvese hazvo kumashure-shure. Hazvina musoro. Asi chiratidzo, chiratidzo ichi, chakaiswa chisimbiso kusvikira pano chaipo zvino. Uye ipapo ndipo pandiri kuisa kutenda kwangu, kuti Mwari vachazarura mavhiki makumi manomwe iwayo. Amen! “Chiise

chisimbiso,” Akati, “kusvikira panguva yekupedzisira. Vhara Mashoko uye uise chisimbiso paBhuku kusvikira panguva yekupedzisira.”

¹⁰⁸ Chii chaAkaita? Kusimbisa chiratidzo nechiporofita! Dhanieri akange aporofita zvinhu izvi. Akanga azviona muchiratidzo, uye Mutumwa akadzika zasi kuzosimbisa chiratidzo, nekusimbisa chiporofita. Vanogona kuzviverenga, asi havagone kuzvinzwisisa, kusvikira panguva yekupedzisira. Nguva yekupedzisira, ndeipi nguva yekupedzisira? Kupera kwevhiki rechimakumi manomwe, apo muchinda uya, antikristu, achazarurwa, panguva ino, achizviita Mwari pachake. Tinoziva sei kuti izvi zvakaiswa chisimbo kusvika panguva yacho? Dhanieri achangopedza; ichi ndicho chitsauko chekupedzisira chaDhanieri.

¹⁰⁹ Hanzvadzi Simpson vanditaurira masikati ano, vati, “Hama Branham, ndakaverenga Bhuku rose raDhanieri. Ini—ini handina kana chimwezve chandakamboziva zvakare pandakamira, ndapedza, kupfuura zvandakaita pandakatanga.” Hezvinoi izvi, Hanzvadzi Simpson, kana muri pano manheru ano. Ndinotenda ndinovaona vakagara neche uko. Handina kumbotaura chinhu mutirera. Ndaramba ndakanyarara, nekuti ndafunga kuti zvichida ndaizovika pazviri.

Asi, chiratidzo chakanga chaonekwa naDhanieri, zasi uko parwizi, chakaiswa chisimbiso, “kusvikira panguva yekupedzisira.” Zviri... Regai ndingoenderera mberi ndozviverenga pano. Maona?

Asi iwe, O Dhanieri, vanza mashoko, uye uise chisimbiso pabhuku, kusvikira panguva yekupedzisira: vazhinji vachamhanya pose-pose, nezivo ichawanda.

Zvino ini Dhanieri ndakatarira, uye, tarira, ipapo pamire... vaviri... mumwe kudivi rimwe... rervizi, uye mumwe kune rimwe divi remahombekombe ervizi.

Uye mumwe akati kumurume akapfeka hanzu dzeri—rineni, akanga ari pamusoro pemvura yervizi, Inguva yakadini kusvikira pakuguma kwezvishamiso izvi?

Zvino teerera.

Zvino ndakanzwa murume wakanga akapfeka hanzu dzerineni, uyo akanga ari pamusoro pemvura yorwizi, paakasimudza ruoko rwake rwerudyi neruoko rweruboshwe kudenga, ndokupika naiye anorarama nokusingaperi—peri kuti zvichava zvenguva imwe, nguva, nehafu yenguva;...

Zvino, tinowana chaizvo—chaizvo nemazvo, “Nguva, nguva, nehafu yenguva.” Zvino tarisai patinosvika mumavhiki makumi manomwe aDhanieri, kuti zvinobuda sei. Ndiipo

pachazozarurwa chakavanzika. Zvakanaka. “Nguva, nguva, nehafu yenguva.”

...uye paacha... (“*iyē*,” chisazitasingwi zvino, antikristu) ...achapedzi-...*apedza apedza* kuparadzira *simba revanhu vatsvene*, (ndipo paanotyora sungano yake pakati pevhiki), izvi zvinhu zvese zvichazadzikiswa. (Ameni.)

Zvino ndakanzwa, asi handina kuzvinzwisisa: ipapo ndikati, O...*Ishe*, chii chichava kuguma kwezvinhu izvi?

Iye akati, Chienda nenzira yako, *Dhanieri: nekuti mashoko akapfigwa* pamwe nokuiswa chisimbiso kusvikira panguva ye... [Ungano inoti, “*Kupedzisira*.”—Mupepeti]

Oo, musakanganwa izvozvo!

...kusvikira panguva yokupedzisira.

Vazhinji vachacheneswa, nokuitwa vachena, nokuyedzwa; asi *vakaipa vachaita zvakaipa*: uye *hakuna* wakaipa *achanzwisisa*; Asi *vakachenjera vachanzwisisa*.

¹¹⁰ Mharidzo yenguva yekupedzisira ichazvizarura; zera rekereke rekupedzisira. Kubwinya! Fiyuu! Hezvoka izvo! Oo, ini zvangu! Zvinondizunguza, kufunga nezvazvo, chakavanzika! Zvinhu izvo chechi yenyika inobwairira maziso ayo, uye yoti, “Hazvina maturo.” Chakavanzika chekuti Jesu Kristu Aive ani; kwete Munhu wechitatu, kwete Munhu wechipiri, kwete Munhu wechitatu, asi Munhu *chaiye* waMwari. Zvese zvimwe zvakananzika izvi zvaMwari zvichazarurwa, nekuti zvakanorwa pano muBhuku rino, uye zvoziviswa kuchizvarwa chenguva yekupedzisira. Havambokwanisi kuzviona mumaseminari, nezvikoro, nemasangano, semaJudha asina kukwanisa kuona Jesu ari Mesia wacho. Ndosaka vachiedza kufunga kuti unopenga. Ndosaka vachifunga kuti uri benzi. Ndosaka vasingakwanise kunzwisisa kuti sei iwe usingadyidzani navo. Nekuti, pane Simba uye nechiratidzo shure kwazvo, Shoko raMwari rakazarurwa, kuisa Chechi muhurongwa kuitira Kubvutwa nekuenda Kumusha. Hongu. “Vazhinji vachamhanya-mhanya, uye ruzivo rwuchawanda.” Zvirokwazvo.

¹¹¹ Zvino, ndechipi chimwe chinhu chichazivikanwa? Tarisai nhasi, kumachechi. Hezvinoi izvi. Ndinovimba kuti hazvirwadzise, asi ndinofanirwa kuzvitaura. Kugadzira...

¹¹² Nezuva iroro kuchava naantikristu achasimuka.

¹¹³ Zvino, rangarirai, patinopinda muZvisimbiso, antikristu iyeye anotasva kunobuda kunze ari pamusoro peZvisimbiso izvozvo. Dhanieri akataura nezvazvo pano, “Muchinda aizouya.”

Aizogurwa, Jesu aizodaro, kuitira yananisiro yevanhu. Asi, “Muchinda iyeye aizosimuka, anokonzeresa chinyangadzo kuti chiite dongo,” yaive Roma, kuburikidza naTito. Uye nguva ino, muchinda ari kubuda kubva muRome, achazviita. Uye achazarurwa muzuva rekupedzisira, zvino teererai, “achizviita Mwari,” sekuyambirwa kwatinoitwa neMweya Mutsvene muna VaTesaronika veChipiri, 2.

Ngatingoendai kwairi, VaTesaronika veChipiri, uye ipapo munenge musina shoko rangu asi Shoko raMwari. VaTesaronika veChipiri, chitsauko 2 uye ndima 12. Ngationei. VaTesaronika veChipiri, chitsauko 2 uye ndima 12. Ngationei. Ngatitangirei pamusoro payo, ndima 7.

*Nekuti chakavanzika chekusarurama
chotoshanda: . . .*

(Uyu ndiPauro ari kutaura, neMweya Mutsvene.) . . .

*asi chete—asi chete iye uyo anotendera zvino
achamurega, kusvikira abviswa munzira.*

Ndiani “Iye” pano? Pane munhu angazivawo here? Mweya Mutsvene, “Iye anotendera.”

Uye ipapo (apo) iye Wakaipa achazarurwa, . . .

Riinhi? Panguva iyo Mweya Mutsvene achange ari kubviswa, uyo ari kugadzirira kuenda zvino. Sei Ari kuenda? Ari kutora Chechi pamwe naYe. “Zvakazarurwa!” Pauro achitaura, pasi pekufemera.

*. . . uyo Ishe vachamuparadza nemweya wemuromo
wake, uye achaparadza nekupenya kwekuuya kwake:
(wakaipa, ndizvo chaizvo)*

*Kunyange iye, kuuya kwake iye kuri kushanda
kwaSatani nesimba rose nezviratidzo nezvishamiso
zvenhema,*

“Tiri chechi hurusa. Tine izvi. Tine izvi. Imi mose batanai pamwe chete,” maona. “Tisu vepamusoro-soro.” Zvishamiso zvenhema!

*Uye nekwose . . . kwekusarurama muna ivo
vanoparara; nekuti havana kugamuchira zverudo
rwezvokwadi, kuti vazoponeswa.*

*Uye nekuda kwechikonzero ichi Mwari vakavatumira
kunyengereka kwakasimba, kuti vafanire kutenda
nhema vafanire kutenda nhema:*

*Uye kuti ivo . . . vazotongwa avo vasina kutenda
zvokwadi, asi vanofarira zvisakarurama.*

¹¹⁴ Muri kuzvibata here? Oo, ini zvangu! Zvino, Pauro achitaura. Nguva iyo Chisimbiso chaMwari chiri kuziviswa, Mweya waVo, Zita raVo, nyasha dzaVo, zvimwe zvakavanzika zvikuru zvese izvi zviri kuitika zvino, zvirongwa zveChechi yaVo kuti ipinde

muKubvutwa; kudururwa kweMweya Mutsvene kwakaita izvi. Ndizvo zvaVakaita mumazuva ekupedzisira.

¹¹⁵ Zvino, ngationei. Tine nguva here yeichi chekupedzisira? [Ungano inoti, “Ameni.”—Mupepeti] Chechitanhatu, “Kuzodza Nzvimbo tsvene-tsvene.” Oo, ini zvangu! Hechinoi chacho! Chinhu chekupedzisira chaAri kuzoita, chiri kuzoitei? Zvino, ngatimbodzokerai kuna Dhanieri, kuti tione zvose zvaAchaita pano chaipo. “Mavhiki makumi manomwe.” Chii chinofanirwa kuitwa munguva iyi? Zvakanaka.

... akatemerwa pavanhu vako uye... guta rako dzvene, kupedzisa kudarika (kudarika kwevanhu), ... kugumisa chivi (chevanhu), nekuyanansira kusarurama kwavo, uye nekuuyisa kururama kusingaperi (kwemaJudha), nekusimbisa chiratidzo nechiporofita (kusvikira panguva yekupedzisira), nekuzodza Nzvimbo tsvene-tsvene.

Ndicho chikonzero chakapetwa katanhatu chekuuya kwaKe.

¹¹⁶ Zvino, “kuzodza Nzvimbo tsvene-tsvene.” Zvino, izvi zvinogona kushamisa zvishoma kwechinguvana chete, kune vazhinji venyu vadzidzisi, asi zvino chimbomirai zvishoma chete, mongoono mabudiro azvinoita.

¹¹⁷ Uku kuzodzwa, kwete kwemunhu. Jesu akatozodzwa kare. Ndizvozvo here? Bhuku raMabasa rakataura kuti Mwari vakazodza Jesu neMweya Mutsvene; Akafamba kwese-kwese achiita zvakanaka, nekupodza vanorwara, nezvimwe zvakadaro. Jesu, atori. Ndiye Mesia. Zvino Mesia zvinoreva “Muzodziwa.” Ndizvozvo here? Asi pano panguva yekupedzisira, Anofanira kuzodza Nzvimbo tsvene-tsvene.

¹¹⁸ Chii “Nzvimbo tsvene-tsvene”? Pamaonero angu andinozviita, ayo andinotenda kuti ndinogona kuaratidza neRugwaro, kuzodza “Nzvimbo tsvene-tsvene,” ichava Tabhanakeri ichazoshandiswa munguva yeMireniyamumu. Zvino teerera, munoono kuti sei ndichizviwana. Zvakatsanangurwa muna Ezekieri, chi—chitsauko 4, iyo...Kwete, ndinoreva chitsauko 43, ndima 1 ne 6. Ngatidzokerei kuna Ezekieri uye tione kuti anofananidzira sei muMireniyamumu, kuti vachazodza sei iyo...Ezekieri 43, zvino regai tingoverenga zvishoma pano zvino tione zvaAchaita muMireniyamumu ino, kuzodza. Muna Ezekieri 43, zvakanaka, uye zvino ngatitangirei pandima 1, kusvika 6. Munogona kuverenga yese mushure mekunge masvika kumba, handitika, imi muri kunyora pasi, Ezekieri 43. “Shure kwezvo...”

¹¹⁹ Zvino, tarisai, tsananguro yeTemberi ichavakwa muMireniyamumu. Zvino, chero munhu, chero muverengi anoziva, kuti kubva pana Ezekieri chitsauko 40, kusvika panenge pachitsauko 44, hapana chimwe chinhu kunze kweTemberi

yemuMireniyamu iri kuvakwa panyika, (chero ani zvake anozviziva, munoono), apo kubwinya kwaShe kunoizadza, nezvimwe zvakadaro. Zvino tiri . . . kuzotsanangura Temberi iri muchitsauko 43, uye ndima 1 kusvika 6.

Pashure akandiunza kusuwo, kunyange suwo raive rakatarisa kurutivi rwamabvazuva:

Zvino, tarira, kubwinya kwa . . . Mwari waIsraeri kwakabva nenzira yokumabvazuva: uye inzwi rakanga rakaita seinzwi remvura zhinji: uye pasi rose rakapenya nokubwinya.

Zvino zvakanga zvakafanana nemamiriro echiratidzo chandakaona, kunyangwe kufanana nechiratidzo chandakaona pandakauya kuzoparadza guta: zvino chiratidzo chaiva chakafanana nechiratidzo chandakaona parwizi rwaKebhari; zvino ini ndikawira pasi nechiso changu.

Zvino kubwinya kwaJEHOVHA—kubwinya kwaJEHOVHA kwakapinda mumba nenzira yesuwo rakatarisa kudivi ramabvazuva.

Saka mweya wakandisimudza, ukandiisa muruvanze rwomukati; zvino, tarira, kubwinya kwaJEHOVHA kwakazadza imba.

Zvino ndakamunzwa achitaura kwandiri kubva mumba; zvino murume wacho akamira neni.

¹²⁰ Kuzodza, kuzodza Temberi iyoyo kuitira humambo hwemuMireniyamu. Zvino cherechedzai muna Revhitiko. Zvino tarisai kuti yakakumikidzwa sei muna Revitiko. Zvino, kana tikadzokera kuna Revitiko, tinoona kuti Mosesi akazodza temberi. Ngatimbodzokerai apo tiri pazviri. Tine nguva yakawanda zvakadaro. Uye ngatidzokerei kuna Revitiko uye tione kuti Mosesi akazodza temberi riinhi, pana Revitiko chitsauko 8.

¹²¹ Oo, ndinongoda kuenzanisa Magwaro aya neMagwaro. Hamuzvidi here? Uye ipapo mu—muchange mangova nemu—mu—mufananidzo weizvo—weizvo zvatiri kutsvaga uye nezvatiri kuita. Zvino, chero ani wenyu anoziva kuti tiri kungoshandisa Rugwaro zvino ipapo, pazviri.

¹²² Zvino, chitsauko 8 chaRevitiko, uye ndanyora pasi pano apa, ndima 10. Cherechedzai Revitiko 8:10. Ngationei.

Zvino Mosesi akatora mafuta ekuzodza nawo, ndokudira mafuta ekuzodza, akazodza tabhanakeri nezvose zvakanga zvirimo, akazvichenesa.

Uye . . . akasasa mamwe kanomwe paaritari, . . . akazodza aritari nemidziyo yose, zvose mudziyo wokushambidzira nechigadziko chawo, kune . . . kuti azvichenese.

Uye *akadira...mafuta ekuzodza nawo pamusoro waAroni, uye akamuzodza, kuti amuchenese.*

123 Mosesi, ari murenje, achichenesa, kana kuzodza tabhanakeri yekunamatira, kuitira vana vaIsraeri pavaive parwendo rwavo. Yakazodzwa.

124 Zvino, muna Makoronike eChipiri, vhurai, uye tichaona kukumikidza kuti apo Mweya Mutsvene wakatora hugaro waHwo patabhanakeri, uye tarisai zvakaitika zvino. Muna Makoronike eChipiri chitsauko 5, zvino ngatitangirei pandima yechi 13. Makoronike eChipiri chitsauko 5, uye kutangira pandima 13.

Uye zvaka...itika, apo hwamanda *nevaimbi* vaive...kuti vaite ruzha rumwe kuti rwunzwike... *vachirumbidza* nekupa kutenda kwaJEHOVHA; zvino *vakati vasimudza* manzwi avo pamwe nehvamanda *namakandira nezvokuridza* zvemumhanzi, uye *vachirumbidza* JEHOVHA, *nekuimba, Nekuti wakanaka;* uye *tsitsi dzake dzinogara nokusingaperi:* zvokuti *ipapo imba yakazadzwa negore, kunyange imba yaJEHOVHA;*

Zvekutoti *vaprisita* vakamira...*vaprisita vakanga vasingagoni* kumira pabasa *vachishumira nekuda kwegore: nekuti kubwinya kwaJEHOVHA* kwakange *kwazadza imba yaMwari.*

125 Mwari vakapinda munzvimbo tsvene yaifanira kuzodzwa, uye ikapihwa kwaVari kuti vanhu vauye kuzonamata. Saka, kuzodza, kwete nzvimbo “yenyu tsvene,” asi kuzodza nzvimbo “Tsvene-tsvene.” Uye tinocherechedza, kuti, Jerusarema Idzva ndiyo nzvimbo “Tsvene-tsvene.” Uye chizoro chichange chiri pamusoro peJerusarema Idzva rinoburuka kubva kuna Mwari richibva Kudenga, rakagadzirirwa somwenga akashongedzera murume wake. Chizoro chichange chiri pamusoro pavo.

126 Zvino, Zerubhabheri paakakumikidza temberi yake, mushure mekunge yavakwa zvakare, haina kuzodzwa zvakare, nekuti yakanga yakatozodzwa kare; uye yaive yakapunzirwa pasi, zvino yakange yangorairwa zvakare. Kuparadzwa kwakange kwauya kwairi. Yakanga yarairwa zvakare uye ikavakwa, saka pakanga pasisina zvokuzodzwa zvakare. Payakazodzwa imwe nguva, kwakaramba kuchienendera mberi, uye kunoendera mberi kusvikira panguva ino chaiyo. Asi kana Mwari vamisa Tabhanakeri yemuMireniyamu, Vachazodza Nzvimbo tsvene-tsvene; kwete “yenyu tsvene,” asi “Nzvimbo tsvene-tsvene.”

127 Asi kana Mambo vatora Chigaro chaVo chehumambo kwechiuru chemakore, (Kubwinya!) zvapera zvino. Kuzodzwa kwenzvimbo Tsvene-tsvene ndicho chichava chinhu chekupedzisira kutora nzvimbo. Kana Tabhanakeri yavakwa; rumuko rwauya; maJudha adzoka; Kristu neMwenga waKe

vauya; muJudha, zviuru zana zvinemakumi mana nemana zvasimbiswa; Mireniyamu yakaitika. Pachave nechizoro apo Nzvimbo tsvene-tsvene ichazodzwa; tsvene, Nzvimbo tsvene-tsvene, uye Nzvimbo tsvene-tsvene. Apo, Nzvimbo tsvene-tsvene ndiyo nzvimbo tsvene yaigara Mwari, pakati pemaKerubhi. Uye, panguva ino, Kristu achagara muNzvimbo tsvene-tsvene, aine chizoro paAri. Uye havazodi zuva ikoko, nekuti Gwayana riri pakati peGuta richava Chiedza. Zuva harife rakanyura muGuta iroro, sezvaisitaurwa namutana Sekuru Jim. Uye harizombofi rakadaro, nekuti Kristu ndiye achave Chiedza ichocho, Muzodziwa. Uye Mambo achauya otona Chigaro chaKe chohushe kwechiuru chimwe chemakore, kuti atonge.

¹²⁸ Jeremia 3:12-18, kusanganisira neepakati, ngatiiverengei. Muna Jeremia chitsauko 18, ndinotenda. Hongu. Kwete, chitsauko 12, ndiregerereiwu, chitsauko 12 chaJeremia, uye ngatitangei ne—ne...Jeremia 3, ndiregerereiwu. Jeremia 3, nda—ndanyora pasi apa, apo, ndiri mukunzvera, Mweya Mutsvene uchingondifambisa kubva panzvimbo kuenda pane imwe nzvimbo, ndakangonyora izvi pasi nepese pandaigona napo. Jeremia 3, uyezve 12 kusvika 18, kusanganisira neepakati. Ngatiiverengei.

Enda unoparidza mashoko aya kurutivi rwokumusoro, uti, Dzokai, imi Israeri yakadzokera shure, ndizvo zvinotaura JEHOVHA; uye handisi kuzoita kuti dzangu—dzangu...kuita kuti hasha dzangu dziwire pamusoro penyu: nekuti ndine tsitsi, ndizvo zvinotaura JEHOVHA, uye handingachengeti hasha nekusingaperi.

Chingobvumai kusarurama kwenyu bedzi, kwamakadarikira JEHOVHA Mwari wenyu, uye mukaparadzira nzira dzenyu kumutorwa pasi pemitu wose wakasvibira, . . .

Ndizvo zvavakaita, kubva kumabvazuva, kumadokero, nyika dzese. Maona?

. . . uye mukasateerera inzwi, inzwi rangu, ndizvo zvinotaura JEHOVHA.

“Tendeukai!” Teererai kune izvi.

Tendeukai, Oo imi vana vakadzokera shure, ndizvo zvinotaura JEHOVHA; nekuti ini ndaka (r-o-o-r- -a) . . . ndakaroorana nemi: . . .

“Maziso avo aive akapofomadzwa, nekuti Ndakapa veMarudzi mukana. Asi, imi dzokai, nekuti Ndakaroorana nemi.”

. . . uye ndichakutorai mumwe paguta rimwe, uye vaviri vemumhuri, . . .

Havasi vese vanozvidaidza kuti maJudha vachapinda. Asi boka iroro rakasanangurwa richapinda, Bhenjamini mudiki iyeye akauya zasi ikoko pamberi paJosefa, boka iroro rakabva kumarudzi ose, mumwe kubva muguta, uye nekubva mumhuri.

...ndichakuunzai kuZioni:

Uye ndichakupai mufudzi zvinoenderana nemoyo wenyu, uyo achakupai chikafu cheruzivo uye nekunzwisisa.

Zvino zvichaitika kuti, kana muchinge mawanda nokuwedzerwa panyika, pamazuva iwayo, ndizvo zvinotaura JEHOVHA, havachatizve, A—areka yesungano yaJEHOVHA: uye havangaifungi zvachose; kana ivo havangairangarira; kana ivo—ivo havangaishanyira; uyewo hazvingazomboitwizve zvachose.

Panguva iyoyo vachatumidza Jerusarema chigaro choushe chaJEHOVHA; (sezvo Achange ariko, munoona), uye rudzi rrose rwuchaungana (hareruya) kwariri, nezita raJEHOVHA, paJerusarema: havachazofambi zvachose nemifungo yavo voga mune zvakaipa zvemoyo yavo.

¹²⁹ Ndipo pachazodzwa Guta iroro. Ndipo pachazodzwa Jerusarema Idzva. Uye marudzi ese eGuta...Uko muna Zvakazarurwa chitsauko 22, yakati masuwo haazovharwi nehusiku, nekuti kunenge kuisina husiku ikoko. Uye madzimambo ese epanyika achaunza rukudzo rwavo nekubwinya muGuta iri. Masvingo aro achange ari edombo rejaspisi uye nesadhisi, mhando dzemabwe gumi nemaviri; uye masuwo anegumi nemaviri achava eparera rimwe rakasimba, rimwe chete pasuwo rega-rega. Kuchange kusingadikanwi kenduru imomo. Hakuzombovi kuine chiedza chezuva zvakare, nekuti Gwayana riri pakati peGuta ndiro richava Chiedza. Uye Achatungamira vanhu vaKe kuenda kuHupenyu husingaperi. Pachave nemiti miviri yakamira, mumwe kudivi rimwe nerimwe rerwizi, uye iyo iri yekupora kwenyika. Ndiye Muzodziwa iyeye achauya, Guta Dzvene richidzika kubva kuna Mwari richibva Kudenga, richiuya panyika.

¹³⁰ Ngatitorei zvino kuti zvii zvichaitika panguva iyoyo. Oo, munozvida here? Ngativhurei kuna Isaya 65, kwechinguvana. Zvakanyanyisa kunaka kuti tizvichirike. Zvakangonyanyisa kunaka kuti tizvisiye. Kunogona kunge kuri kuti pisei zvisihoma, asi ngatirambei tichifamba.

¹³¹ Isaya 65, teererai zvichaitika panguva iyoyo. Uye chingozvibvunza, shamwari mutadzi, kana iwe—kana iwe uchikwanisa kupotsa izvi. Isaya 65, ngatitangirei sepandima 17. Teererai, munhu wese, nepedyo zvino. Izvi zviri munguva yeMireniyamu, apo Nzvimbo tsvene-tsvene inozodzwa.

Nokuti, tarirai, ndinosika matenga matsva uye... nyika itsva: uye yekare haingarangarirwi, kana kuuya mumufungo.

Asi ivai...munofara mupembere...kuyangwe pamusoro pezvandinosika: nekuti, tarirai, ndinosika Jerusarema...ndinosika Jerusarema, (ndiro Jerusarema Idzva), mufaro, uye nevanhu varo mufaro.

Chii chizoro? Mufaro waShe.

...kusika Jerusarema rive mufaro, navanhu varo mufaro. Uye Ndichafarira Jerusarema,...

Mambo muChigaro chehushe, pahumambo hukuru hweChigaro chehushe, Chigaro chemuna Ziyendanakuenda, uye nevanhu vemuna Ziyendanakuenda vane mufaro wemuna Ziyendanakuenda muGuta remuna Ziyendanakuenda! Oo, ini zvangu!

Zvino ndichafarira Jerusarema, nokuwa nomufaro muvanhu vangu: uye hamuchazonzwi inzwi rekuungudza mukati maro, kana inzwi rekuchema.

Hakuchazovipozve ikoko...mucheche wemazuva mashoma, kana mutana asina kuzadzisa mazuva ake: nekuti mwana achafa ave nezana ramakore; asi mutadzi aine makore zana achatukwa.

Uye vachavaka dzimba, nokugaramo;...vachasima minda yemizambiringa, uye vagodya michero yayo.

Havazovaki dzimba, mumwe achizogaramo; (kureva kuti, unofa uye mwanakomana wako otona nzvimbo yako) ...kuvaka, mumwewo achizogaramo; havangasimi, mumwe achizodya pazviri: nokuti semazuva emuti achava mazuva evanhu vangu, uye vasanangurwa vangu vachapedza nguva refu vachafarira mabasa emaoko avo.

Havangabatiri zvisina maturo, kana kuunza zvova matambudziko; nekuti imbeu yevakaropafadzwa yaJEHOVHA, uye vana vavo vainavo.

Uye zvichaitika kuti, ...vasati vadana, ini ndichavapindura;...(Chizoro ichocho chakabwinyiswa, chiri kuseri kweKerubhi!) ... ndichapindura; uye vachiri kutaura, ndichanzwa.

Mhumhi negwayana zvichafura pamwe chete, ... shumba ichadya huswa senzombe: guruva richava zvokudya zvenyoka. Zvino havangakuvadzi kana kuparadza mugomo rangu rose dzvene, ndizvo zvinotaura JEHOVHA. (Ungazvipotsa here? Kwete!)

¹³² Todzokera kumashure uko zvakare, naIsaya achitaura zvakare, pachitsauko 11, ndima 1 kusvika 9. Teererai

zvaanotaura pano zvakare, paanobata chiratidzo, mushure mekunge aona vakadzi, maitiro avachange vachiita mumazuva ekupedzisira. Ni- . . . Zvino, Isaya 11, kusvika 1.

Zvino pachabuda tsvimbo kubva pahunde yaJese, . . . Davi iro richakura kubva mumidzi yake: (Aiva ani? Kristu.) . . . kubva mumidzi yake:

Uye mweya waJEHOVHA uchagara pamusoro pake, mweya wehuchenjeri, newekunzwisisa, mweya wekuraira . . . simba, mweya wezivo uye . . . nokutya JEHOVHA;

Uye uchamuita kuti ave kunzwisisa kunokurumidza mukutya JEHOVHA: uye haangatongi nokungoona nameso ake bedzi, kana . . . nokungonzwa kwenzeve dzake:

Asi nekururama achatonga varombo, nekutsiura kusarurama kwavo kune vanyoro venyika: uye acharova nyika netsvimbo yomuromo wake, uye nokufema kwemiromo yake achauraya vakaipa.

Vakarurama vachasungwa zviuno, uye vakatendeka bhanire remuzviuno zvavo.

Uye nemhumhiwo ichagara negwayana, uye ingwe ichavata pasi nembudzana (ndiyo mbudzi); nemhuru nemwana weshumba nechipfuwo chakakora . . . kana mhuru, kana kuti shumba nechipfuwo pamwe chete; uye mwana mudiki achadzitungamirira.

. . . mhou nechitsere zvichafura; . . . vana vadzo (uye) dzichavata pamwe chete: uye shumba ichadya uswa senzombe.

Uye mwana anoyamwa achatamba pamusoro pemwena wenyoka, uye mwana akarumurwa achaisa ruoko rwake mumwena wechikara.

Hazvingakuvadzi kana kuparadza mumakomo angu ose matsvene: nekuti nyika ichazara neruzivo . . . semvura inofukidza gungwa.

Hum! Ndeumo muJerusarema Idzva racho. “Idzva” racho. Davi, pano, rinotaurwa nezvaro, riri Davi raDhavhidhi. “Ndiye zvese Davi neBukira.”

¹³³ Zvino, mushure meizvi, Mwenga unoonekwa. Mushure memavhiki makumi manomwe, Mwenga unoonekwa muna Zvakazarurwa chitsauko 19, vhesi 1 ne 16. Unosvika pamwe neChikomba chaWo, Mambo ane simba. Oo, ini zvangu! Handizive kana tichazviwana zvese kana kuti kwete. Ndangozvitora sokuti . . .

Saka, ngatingoverengai chikamu cheichi, zvisinei hazvo. Hepano pachauya Mwenga, mushure meizvi. Maona? Mushure

mekunge Mireniyamu yatanga, ipapo Kristu anobva adzoka neMwenga. Ndizvo, 1 kusvika 16, uye chitsauko 19.

Uye *mushure* mezvinhu izvi. . .

Mushure menguva yeKutambudzika iyi; mushure meNhamo; mushure meZvisimbiso; mushure meMatenda; mushure mekudzlingwa kwaSatani; mushure mekugadzwa kweMireniyamu. Tarisai!

. . .mushure mezvinhu izvi ndakanzwa. . .izwi revanhu vazhinji kudenga, richiti, Hareruya; Ruponeso, nekubwinya, . . .kukudzwa, . . .simba, kuna Ishe Mwari wedu:

Nekuti kutonga kwenyu ndekwe chokwadi uye kwakarurama: nekuti wakange atonga mhombwe huru, yakaodza nyika nehupombwe hwayo, uye akatsiva ropa revaranda vake paruoko rwayo.

Uye zvakare iye. . .ivo. . .Uye zvakare vakati, *Hareruya. Uye utsi hwaro hwakakwira kumusoro nokusingaperi-peri.*

Ndiyo chechi yekare chipfeve, “hutsi hwayo hwakakwira mudenga.”

Zvino vakuru vanamakumi maviri nevana nezvisikwa zvipenyu zvina vakawira pasi vakanamata Mwari akanga agere pachigaro chehushe, vachiti, Ameni; Hareruya.

Zvino inzwi rakabuda kubva pachigaro chohushe, richiti, Rumbidzai Mwari wedu—Rumbidzai Mwari wedu, imi mose varanda vake, nemi munomutya, zvese vaduku nevakuru.

Zvino ndakanzwa sekunge raiva inzwi revanhu vazhinji, . . .

Teerera! Hezvoka izvo, Chechi. Mushure mekunge Yakwira kumusoro muchitsauko 3, heinoi Ichiuya. Maona? Uye zvino chitsauko 6.

Zvino ndakanzwa senzwi revanhu vazhinji-zhinji, uye senzwi remvura zhinji, uye sezwi rekutinhira kune simba, richiti, Hareruya: nekuti Ishe Mwari wemasimba ose anotonga.

Hareruya! Tarirai! Muchato weGwayana unouya zvino. Heunoi Mwenga achiuya.

Ngatifarei nekupembera, timukudze: nekuti muchato weGwayana wasvika, uye mudzimai waro wazvigadzirira. (Heunoi Achiuya, vese, Mwenga neChikomba.)

Uye kwaari kwakapiwa kuti apfeke mucheka wakanaka, wakachena uye uri muchena: nekuti mucheka wakanaka ndiwo...kururama kwevatsvene.

Zvino akati kwandiri, Nyora, Vakaropafadzwa avo vakadanwa kuchirariro chemuchato weGwayana. Zvino akati kwandiri, Awa ndiwo...mashoko ezvokwadi aMwari.

Zvino ndakawira pasi patsoka kuti ndimunamate. Zvino akati kwandiri, Rega kudaro: Ndiri muranda pamwe chete newe,...hama dzako uye dzine...hama dzako uye dzine huchapupu hwaJesu: namata Mwari: nekuti huchapupu (hwaKristu) hwaJesu ndiwo mweya wechiporofita.

Zvino ndakaona denga rakazarurwa, uye...bhiza jena;... (oh ini zvangu!)...naiye ainge akakwira pamusoro paro...ainzi Akatendeka neWezvokwadi, uye...zvakarurama anotonga uye nokurwa.

Uye meso ake ainge akaita semirazvo yemoto, uye... musoro wake paiva pane korona zhinji;...

Akagadzwa korona achinzi ani? “Mambo wemadzimambo.”

...uye akange ane zita rakanyorwa, raisazivikanwa nemunhu, asi...iye pachake.

Zvino wakange akapfeka nguvo chena yakanyikwa muropa: uye zita rake rinonzi Shoko raMwari.

“Pakutanga Shoko rakanga riripo, uye Shoko rakanga riri Mwari. Zvino Shoko rakaitwa nyama rikagara pakati pedu.” Aive Ani? Jesu.

...uye zita rake rinonzi Shoko raMwari.

Uye mauto aive kudenga akamutevera akatasva mabhiza machena, vakapfeka mucheka wakanaka, muchena uye wakachena. (Kubwinya! Heunoi Uchiuya.)

Uye kubva mumuromo make munobuda munondo unopinza, uno...uye kuti waifanira kurova rudzi: uye...uchavatonga netsvimbo yedare: anotsika chisviro chekutyisa kwehasha dzaMwari Wemasimba ose.

Zvino aive ane panguwo yake napachidya chake pakange pakanyorwa zita rinoti, MAMBO WAMAMBO, NASHE WASHE.

¹³⁴ Chaiva chii? Vanhu vaKe vaininge vachangoMugadza korona kuti ave Mambo wamambo, uye naIshe wemadzishe. Achidzokera kuTemberi yaKe tsvene, yakazodzwa neHupo hwaMwari, kugara nekutonga muMireniyamu pamwe neChechi yaKe. Ameni! Kuonekwa, pamwe naMambo ane simba, kuti

atore nzvimbo yaKe parutivi rwaKe, Temberi itsva yakazodzwa yehumambo.

¹³⁵ Zvino chinangwa chakapetwa katanhatu chaZvakazarurwa 6:1 kusvika kuna Zvakazarurwa 19:21 chazadzikiswa.

¹³⁶ Teererai zvino, mukuvhara. Zvisimbiso Zvinomwe, Hwamanda Nomwe, Ndiro Nomwe dzematenda, Nhamo Nhatu, mudzimai ari muzuva, kudzingwa kwadhiyabhore, kana shato tsvuku, kunouya pakati penguva idzi munguva yeKutambudzika kukuru. Musazvikanganwe. Zvinhu zvese izvi zvinoitika panguva iyi.

Asi hechino chinangwa chakapetwa katanhatu cheKuuya kwaKe. Munozvitenda here? Inguva inobwinya zvakadii yakachengeterwa avo vanoda Ishe! Ndinokuudza, shamwari, hazvibviri kuti tizvipotse. Usapotsa izvozvo, pane chero chipi chaunoita. Iva nechokwadi!

¹³⁷ Zvino, Svondo inotevera, kana Ishe vachitendera, Ndinoda kuratidza, kana Vakandibatsira, kuratidza chaipo–chaipo pane rimwe nerimwe remazuva manomwe aya, kwaakaitika, ndichiunza ichi chinhu chimwe chete—chimwe chete chandaita nhasi, nekuisa idzo nguva nomwe, mavhiki manomwe, mavhiki makumi manomwe munzvimbo chaiyo yenzvimbo tsvene yechiJudha, nekuratidza chaizvoizvo patiri kurarama pano kumagumo, Ishe vachitendera.

¹³⁸ MunoVada here? [Ungano inoti, “Ameni.”—Mupepeti] Ungakwanisa here kupotsa Denga? [“Kwete.”] Tave panguva yekupedzisira!

Chii chaAri kuuya kuzoita? Chinhu chekutanga chichaitika, Jesu asati ambouya panyika, chii chichava chinhu chekutanga? Chechi icha (chii?) ichabvutwa! Jesu achauya here panyika ofamba achitenderera paguva, nekukwazisana maoko nababa naamai, otaura nesu tese pano, uye tozoenda kumusoro? Kwete!

Zvichava sei? Iyo... Tinotaura izvi kwamuri, ne—neShoko raShe, “Kuti isu vapenyu uye vakasara...” VaTesaronika Vechipiri, chitsauko 5, “Isu vapenyu uye vakasara kusvika paKuuya kwaShe, hatizotadzise kana kudzivisa avo vakarara. Nokuti hwamanda yaMwari icharira; vakafa muna Kristu vachatanga kumuka: uye isu vapenyu vakasara tichabvutwa pamwe chete navo kuti tinosangana naShe mudenga.” Tichabvutwa munguva pfupi, mukubwaira kweziso. Munguva iyoyo, zvinopedza Zera reChechi.

¹³⁹ Zvino, zasi kuno panyika Mwari vanotanga kushanda nemaJudha. Kuchave nevaporofta vaviri. Chitsauko 11, tichazvinhonga izvozvo. Vaporofta vaviri vakazodzwa, saEria naMosesi, vandinofunga kuti ndivo. Zvino vachauza kutukwa kukuru, mushure mekunge vaona kuti vabatanidzwa, uye Roma yaputsa sungano yayo, muchinda uya.

Pakati pevhiki iri rechimakumi manomwe, ichaputsa sungano yayo neRoma, kana kuti Roma ichaiputsa neIsraeri, uye zvichakonzera kuti chinyangadzo chitange kupararira. Uye kuchave nemafashama makuru, apo veMarudzi vakasara, mhandara yakarara . . . Chikara, Roma, yakasvipa mvura kubva mumuromo mayo, kuita hondo nevakasara vembeu yemudzimai vanochengeta mirairo yaMwari. Roma ichaita izvozvo.

¹⁴⁰ Mubatanidzwa wechechi uchavabatanidza pamwe chete, nekuunza maJudha mukubatana uku, nekuvadzosa pakunamata kwavo chaiko kwemutemberi zvakare, mune ZVANZI NAJEHOVHA kubva muBhaibheri, uye vachava nechechi yavo pachavo.

¹⁴¹ Vave chii zvino? Ndangozvibata izvozvi chaiye. Zvitori zvitsva. Vave rudzi zvino, rwakacherechedzwa. Ndizvozvo here? Asi havasati vava nekunamata kwavo kwemutemberi nazvino. Uye pavanotangisa kunamata kwemutemberi, Chechi inenge yaenda. Mwari vanenge vave kushanda nemaJudha serudzi. Uye ipapo kana vaunzwa mumubatanidzwa uyu, Roma ichaiputsa pakati pegore rechimakumi manomwe, makore matatu nehafu, achaputsa sungano iyoyo navo, nekukonzera kuti chinyangadzo chinaita dongo chipararire kusvika kumagumo. Ipapo achatora vese muProtestanti, nemuJudha, ovatambudza. Munguva iyoyo, vaporofita vaviri ava vachasimuka uye votuka nyika, kuti mvura irege kunaya mumazuva echiporofita chavo. Uye vachadana Moto kubva Kudenga, nezvimwe zvese. Imi chingomirai. Tine zvakawanda zviri pano, zvatakachengeterwa, kuti tidzidze.

¹⁴² Oo, NdiMwari vakuru zvakadini! NdiBaba vane tsitsi zvakadii! Shamwari, regai nditaure izvi, semufudzi wenyu. Hamusi kuziva kodzoro dzakatsaurwa dzamusiri kushandisa. Hamusi kuziva. Kune varume vazhinji vakuru, kune vatvone vazhinji, kune zviuru zvevanhu vatvone vakafa mumakore akapfuura, Varume vakazadzwa neMweya vangadai vakada kuona zuva rino rauri kurarama mariri. Dai iwe neni tatora mukana waro.

¹⁴³ Chii chimwe chatinofanira kutarisira kwachiri? Chii chatingaite mushure meizvi? Tiri kuenda kupi? Chii chichaitika? Tinofanira kuenda kune imwe nzvimbo. Haukwansi kugara pano nguva dzese. Unogona kucheka huswa hwako; vhiki rinotevera hunoda kuchekwa zvakare; hongu, kaviri, nguva iyoyo isati yasvika. Unogona kurera vana vako. Unovapa kudya kwavo kwemasikati; panguva yekudya kwemanheru vava nenzara zvakare. Vape chikafu pakudya kwemanheru; vave nenzara zvakare mangwanani anotevera. Unovatengera peya yeshangu; kana vakaita sevanu, inenge mwedzi miviri kana mitatu unovatengera imwe peya. Unovatengera mbatya mwedzi uno; mwedzi kana miviri unovatengera mbatya itsva. Maona? Hakuna chinhu chiri kuenderera. Hakuna chinhu chakagadzikana. Hakuna chinhu chinogona kumira.

Usachiva pfuma yenyika ino isina maturo,
Inokasika kugarara,
Vakira tariro yako pazvinhu zveKusingaperi,
Hazvizofi zvaka pfuura!

Nguva izere neshanduko inokurumidza,
Hapana panyika chisingazungunuke
chinogona kumira,

Vakira tariro yako pazvinhu zveKusingaperi,
Bata ruwoko rwaMwari rwusingashanduki!

Bata ruwoko rwaMwari rwusingashanduki!

Bata ruwoko rwaMwari rwusingashanduki!

Vakira tariro yako pazvinhu zveKusingaperi,

Bata ruwoko rwaMwari rwusingashanduki!

Teererai:

Kana rwendo rwedu rwapera, (Vachatizivisa
kana rwapera.)

Kana kuna Mwari tanga takatendeka,
Wakanaka uye wakajeka musha wedu uri
muKubwinya, (Guta riya rakazodzwa.)

Mweya yedu yakabvutwa ichaona!

Bata ruwoko rwaMwari rwusingashanduki!

Bata ruwoko rwaMwari rwusingashanduki!

Vakira tariro yako pazvinhu zveKusingaperi,

Bata ruwoko rwaMwari rwusingashanduki!

Usachiva pfuma yenyika ino isina maturo,

Inokasika kugarara,

Ingovakira tariro yako pazvinhu
zveKusingaperi,

Hazvizofi zvaka parara!

Bata ruwoko rwaMwari rwusingashanduki!

Bata ruwoko rwaMwari rwusingashanduki!

Vakira tariro yako pazvinhu zveKusingaperi,

Bata ruwoko rwaMwari rwusingashanduki!

Tichikotamisa musoro wedu, kana wanga usati
wakambobata ruoko rwaKe, haungangouyi here uzviite zvino?

Bata ruwoko rwaMwari rwusingashanduki!

Vakira tariro yako pazvinhu zveKusingaperi,

Bata ruwoko rwaMwari rwusingashanduki!

¹⁴⁴ Musikana mudiki, iwe wave chimhandara chidiki,
chakanaka zvino. Bvudzi rako diki rakanakisa, tumatama
twako tudiki twakatsvukirira. Asi, unoziva, achazongova
mangwana, kusvikira, paachapera. Ko tinoziva sei kuti svondo
rinouya tupukanana tunenge tusingadyi, muvhu, matama iwayo
akanaka, madiki, matsvuku?

¹⁴⁵ Hama yechidiki, wakasimba, uri mukuru, mhasuru
dzakasimba; une tarisiro huru. Asi mushure mechinguva,

mangwana chete, bvudzi iroro rakanaka, rakamonana richadonha, uye iro raunosara naro richachena. Mapendekete iwayo makuru, akatwasuka achakombamira pasi, uye tupukanana twuchatanga kudya mumaoko pamwe nemunyama. Vachakuisa kure, muguruva.

Saka, vakira tariro yako pazvinhu
zveKusingaperi,
Hazvizofi zvakaparara!
Bata ruwoko rwaMwari rwusingashanduki!
Bata kune rwaMwari. . .

Ndinoda kuti usveverere mudenga uye ubate ruoko rwaKe zvino.

Vakira tariro yako pazvinhu zveKusingaperi,
Bata ruwoko rwaMwari rwusingashanduki!
Zvino kana rwendo urwu rwapera, (Rwuchava,
rimwe zuva.)
Kana kuna Mwari wanga wakatendeka,
Wakanaka uye wakajeka musha wako uri
muKubwinya,
Mweya wako wakabvutwa uchaona!
Ko wadini wabata ruoko rwaMwari
rwusingashanduke!
Bata ruwoko rwaMwari rwusingashanduki!
Vakira tariro yako pazvinhu zveKusingaperi,
Bata ruwoko rwaMwari rwusingashanduki!

¹⁴⁶ Ndakaona zvionwa zvakawanda, angada kusvika makore makumi matatu nerimwe ndiri kuseri kwepurupiti. Ndakaona zvionwa zvinosuwisa; Ndakaona zvionwa zvakabwinyiswa. Chionwa chinonyanyisa kusuwisa chandati ndamboona muhupenyu hwangu. . . Kunyangwe ndakaona vana vaiziya nenzara mumugwagwa; Ndakaona vanaamai vachikumbira chimedu chechingwa chimwe chete. Chionwa chinonyanyisa kusiririsa chandakamboona, kuona munhu, munhu wenyama, uye anofanirwa kuve ari mwanakomana waMwari, achifa asingazive Mwari.

¹⁴⁷ Ndinorangarira mukadzi akamira pamusuwo humwe husiku, wechечи ino, akandiseka. Ndokuti, “Handiregi mombe yangu ive nemhando yechinamoto chaanacho!” Munguva isingasviki awa imwe, ndakashevedzwa kuchipatara. Mukadzi ane runako, angangoita makore makumi maviri nemaviri, aive achidanidzira, “Unzai muparidzi uya pano!” Aiva muKatorike, pakutenda.

Pandakakwira kumusoro, hanzvadzi yechikuru yakati, “Matononoka, Hama Branham. Afa anenge maminitisi mashanu apfuura.”

Ndikati, “Ndinokwanisa kumuona here?”

Vakati, “Adanidzirira achikudai, mumashoko ake ekupedzisira, ‘Unzai muparidzi uya, Hama Branham!’”

Murume wake aive aripo, achishevedzera, “Muisirei munamoto! Isai munamoto!”

Ndakati, “Hazvichisina basa zvino.”

¹⁴⁸ Ndakadzikisa chifukidzo zasi. Aive nemaziso makuru kwazvo ebhurauni. Mukadzi ane runako; tumavara tudiki kumeso kwake; bvudzi dzvuku; achiyevedza kwazvo. Akange atambura zvakanyanya kwazvo kusvikira mavara akabuda kunze kumeso kwake semapundu. Maziso ake aive abuditswa kunze kwemakomba awo, saizvozvo. Uye, chaizvoizvo, hura hwake neitsvo zvainge zvasanda, zviri mu—mu . . . Munhu wese anozviita pavanenge vari kufa, kunyanya. Zvino hapo paaive, akarara muchinhano chakadaro, muromo wake wakashama. Uye zvivharo zvake apa, zvakange zvavhara hafu yechikamu chebhurauni cheziso rake. Handimbofi ndakazvikanganwa. Rwiyo irworwo rwakauya mupfungwa dzangu.

Usachiva hupfumi hwenyika husina maturo.
(Runako, kushamisira.)

¹⁴⁹ Ndakamira parutivi rwemumwe murume neche kuno chaiko kuPort Fulton, achifa. Vakandidaidza kurutivi rwemubhedha wake. Uye ndakanamata naye pano paartari humwe husiku. Akaisa ruoko rwake rwakambundira mumwe mukadzi. Ndikati, “Bvisa ruoko rwako kubva pamudzimai iyeye.”

Akati, “Ndiri kumutungamira kuna Mwari.”

¹⁵⁰ Ndikati, “Kwete neruoko rwako rwuri paari.” Handitende muzvinhu zvakadaro. Akandigumbukira. Akabuda zvine hashu pamusuwo.

Ndakaenda kwaari, papera chinguvana, paakanga ave kufa. Akanditarisa kumeso, ndokuti, “Musandinamatire, Hama Bill. Ndarasika. Ndaenda.” Akati, “Zvese zvandakambowana, zvakaenda.”

¹⁵¹ Ndakamira kunze kuno chaiko pakona, chinhambwe chidiki kubva pano, rimwe zuva, kune mumwe murume akandishevedza kurutivi rwemubhedha wake paainge ave kufa. Akati, “Ndaigara ndichida *zvakati-nezvakati*, nezvakati.” Akati, “Asi handina kumbobvira ndashumira Ishe. Nguva zhinji ndakarega kuenda kuartari.” Akati, “Hama Branham, namatai kuti Mwari vatendere mwanasikana wangu mudiki areverere pane zvinhu zvandakaita. Pamwe anogona kuitira Ishe chimwe chinhu.”

¹⁵² Ndikati, “Izvozvo hazvigone kuitwa, hama. Zvinhu zvamungadai makaita zvakarasiika.” Hum!

¹⁵³ Ndakamira pane mumwe murume, ndokumuona achirwisa madhimoni kwemaawa makumi maviri nemana. Akati madhimoni aive akamira parutivi rwemubhedha wake nengetani

dzakamoneredzwa muhuro mawo. Akati, “Musaatendera kuti anditore!” Achidanidzira; vakamubata pamubhedha. Akati, “Hapo parakamira. Hamusi kuriona here? Riri kundivinga.” Akanga aramba Mwari, nguva yakanyanyisa kureba. Aive nematura makuru akazara nehuswa, akazara negorosi, aine mabhiza emujawo akanaka. Gore raive rapfuura zvisati zvaitika, akatuka Mwari kumeso kwaVo, akawatsura mukadzi wake nekuda kwekuenda kutabhanakeri. Munoziva zvakaitika? Mheni yakarova dura rake, ndokuuraya mabhiza ake, ikapisa huswa hwake. Zvino murume uyu akafa akabatwa neimwe mhando yemweya wakaipa, achirwisa madhimoni kubva paari.

¹⁵⁴ Uye shamwari yangu yekare (kubwinya!) amire uko, akasvika kumagumo enzira. Ndakati, “Mava kuenda here, baba?”

Akati, “Ndizvozvo, Billy.”

Ndikati, “Zviri sei?”

¹⁵⁵ Akati, “Zvese zvakanaka.” Akati, “Hunzai vana vangu kuno kudivi remubhedha.” Akaisa maoko ake ekare asina simba pane mumwe nemumwe wevana vake akavaropafadza. Akaudza vanakomana vake vaviri, akati, “Turikai maoko angu mudenga, muasimudze, sezvakaitwa naJoshua naKarebi.” Taisaziva zvaaida kuzotaura. Akati:

Zuva rekufara, zuva rekufara,
Kubvira Jesu akashambidza zvivi zvangu!
Akandidzidzisa kurindira nemanamatiro,
Nekurarama ndichifara mazuva ese.

Tine zvimwe zvezvinhu izvozvo zvatichauya kwazviri, shamwari! Hapana munhu asingashuviri kudya chikafu chakanaka, kutyaira mota yakanaka, tova nezvakanakisisa zvatinogona kuva nazvo. Handimupi mhosva. Zvakanaka. Mwari vanoda kuti uve nazvo, asi:

Usachive hupfumi hwenyika ino husina
maturo,
Hunokasika kuparara,
Vakira tariro yako pazvinhu zveKusingaperi,
Hazvizofi zvakararara!

Ngatisimudzei maoko edu zvino tichiimba.

Bata ruwoko rwaMwari rwusingashanduki!
Bata ruwoko rwaMwari rwusingashanduki!
Vakira tariro yako pazvinhu zveKusingaperi,
Bata ruwoko rwaMwari rwusingashanduki!

¹⁵⁶ Tichakamira, ngatitendeukei tikwazisane maoko nemumwe munhu zvino. Tichaenderera mberi, neshumiro, munguva pfupi. Asi ndinoda kuti mutendeuke tichiimba imwe ndima yerwiyoy irworwo.

Bata ruwoko rwaMwari rwusingashanduki!

Zviitei, baba! Zviitei, baba! Kuna Mwari! Zviite, wezera rekuyaruka! Zviitei, hama! Zviitei, hama!

Vakira tariro yako pazvinhu zveKusingaperi,
Bata ruwoko rwaMwari rwusingashanduki!

¹⁵⁷ Hamusi kuVafarira here? Itai “Ameni!” [Ungano inoti, “Ameni!”—Mupepeti] Vose vanoVada, itai, “Ishe ngavarumbidzwe.” [“Ishe ngavarumbidzwe!”] Vese vanotenda kuti muri kuenda kuGuta iroro rine mativi mana akaenzana, simudza ruoko rwako. (Mira, zvisvishoma, nerwiyo rwako.)

Ndakananga kuGuta iroro rakanaka,
(Rwunofamba sei zvino?)
Ishe ravakagadzirira Vavo Vomene;
Uko vose vakadzikinurwa vemazera ose
Vanoimba “Kubwinya!” vakakomberedza
Chigaro Chichena chehumambo;
Dzimwe nguva ndinosuwa kumusha Kudenga,
Uye nekubwinya ini ikoko ndichaona:
Uchava mufaro wakadii, pandinoona
Muponesi wangu,
MuGuta iroro rakaisvonaka rendarama.

Hamuzvifariri izvozvo here?

Ndakananga kuGuta iroro rakanaka,
Ishe wangu ravakagadzirira vaVo Vomene;
Uko vose vakadzikunurwa vemazera ose
Vachaimba “Kubwinya” vakakomberedza
Chigaro Chichena chehumambo;
Oo, dzimwe nguva ndinosuwa kumusha
Kudenga,
Uye nemifaro ini ikoko ndichaona:
Uchava mufaro wakadii, pandinoona
Muponesi wangu,
MuGuta iroro rakaisvonaka rendarama.

MunoMuda here? [Ungano inoti, “Ameni.”—Mupepeti]
Zvino:

Tora Zita raJesu pamwe newe,
Mwana wekusuwana nenhamo;
Richakupa mufaro nokunyaradzwa,
Ritore kwese kwaunoenda.
Zita Rakakosha, (Zita Rakakosha!) O
rinotapira sei! (O rinotapira sei!)
Tariro yenyika nemufaro weDenga;
Zita Rakakosha, (Zita Rakakosha!) O
rinotapira sei!
Tariro yenyika nemufaro weDenga.

Zvino, musakanganwa mangwanani eSvondo inotevera, nine-thirty. Uye ipapo tichaedza, kana Ishe vachitendera,

tipedze nenguva, kuti tive nekunamatira vanorwara, Svondo inouya mangwanani nanine-thirty.

PaZita raJesu tichigwadama,
Tozvambarara patsoka dzaKe,
Mambo wamadzimambo Kudenga
tichaMugadza korona,
Kana rwendo rwedu rwapera.

Zita Rakakosha, (Zita Rakakosha!) O
rinotapira sei! (O rinotapira sei!)

Tariro yenyika nemufaro weDenga;

Zita Rakakosha, (Zita Rakakosha!) O
rinotapira sei!

Tariro yenyika nemufaro weDenga.

Chingoteererai pandima iyi:

PaZita raJesu tichigwadama,
SeNhowo kubva kumuteyo yose;
Kana miyedzo yaungana yakakumomotera,
Ingofema iroo Zita Dzvene mumunamato.
(Rinozviita!)

Zita Rakakosha, (Zita Rakakosha!) O
rinotapira sei! (O rinotapira sei!)

Tariro yenyika nemufaro weDenga;

Zita Rakakosha, (Zita Rakakosha!) O
rinotapira sei!

Tariro yenyika nemufaro weDenga.

Zvino ndinoisa shumiro kumufundisi, Hama Neville, kuti vave nemazwi avo ekuvhara uye nechero chipi chavangade kutaura.



CHINANGWA CHAKAPETWA KATANHATU
CHEKUSHANYA KwaGABRIERI KUNA DHANIERI SHO61-0730E
(The Sixfold Purpose Of Gabriel's Visit To Daniel)

MHARIDZO DZAKATEVEDZANA DZEMAVHIKI MAKUMI MANOMWE ADHANIERI

Mharidzo iyi neHama William Marrion Branham, yakaparidzwa kwokutanga neChirungu Svondo manheru, Chikunguru 30, 1961, paBranham Tabhenakeri muJeffersonville, Indiana, U.S.A., yakazotorwa kubva patepi yakarhekodwa ndokuzodhindhwa muChirungu pasina chakamurwa. Kuturikirwa uku muchiShona kwakazodhindhwa nokugoverwa neve Voice Of God Recordings.

SHONA

©2021 VGR, ALL RIGHTS RESERVED

VOICE OF GOD RECORDINGS, ZIMBABWE OFFICE
8 ST. ANNES ROAD, AVONDALE, HARARE, ZIMBABWE

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.

www.branham.org

Chiziviso chekodzero

Kodzero dzose dzakachengetedzwa. Bhuku iri rinokwanisa kudhindhwa papirinda yekumba kuti ushandise uri iwe pachako kana kugovera kunze, usingatengesi, semudziyo wekuparadzira Evhangeri ya Jesu Kristu. Bhuku iri harigoni kutengeswa, kudhindhwa akawanda, kuiswa pawebhusaiti, kana kuwana mumuchina waringachengeterwa, kuturikirwa mune mimwe mitauro, kana kushandiswa kukumbira mari pasina mvumo yakanyorwa neveku Voice Of God Recordings®.

Kuwana umwe umboo kana zvimwewo zviripo zvingawanikwa, tapota nyorerai:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org